

NJAAUX JIEX LEIZ NYEI MIENH

JIEX WUOM NYEI LEIZ

Hnangv haaix nor njaaux mienh jiex wuom nyei leiz nyei jauv, mbuo zaah mangc gaax zoux haaix nyungc mbuo oix zuqc jiex wuom nyei leiz oc.

Mbuo sienx nyungc-nyungc jauv zungv maaih leiz dorh jienv mbuo mingh, maaih sou njaaux mbuo hnangv haaix nor zoux. Wuov nyungc, naaiv deix leiz, naaiv deix sou se haaix dauh nyei? Haaix dauh maaih lingc, maaih leiz yaac maaih hatc maaz heuc mbuo jiex wuom nyei leiz? Dongh maaih qaqv, maaih leiz, maaih lingc yaac maaih hatc maaz heuc mbuo jiex wuom nyei leiz wuov dauh se dongh Tin-Hungh ganh aqv. Ging-Sou yaac gornqv mbuox mbuo, buo dauh Ziouv benx Yietc Dauh Tin-Hungh hnangv. Se maaih Singx Diex, Singx Dorn canx Singx Lingh. Mbuo yaac buac Ging-Sou gornqv mbuox mbuo, Ziouv Yesu ganh yaac jiex wuom nyei leiz fih hnangv nyei. Weic zuqc yiem Matv^taai 3:16-17, wuov hnangv naaiv gornqv,

16 Yesu jiex leiz yiem wuom cuotv daaih wuov zanc, liemh zaih lungh nqoi. Yesu buac Tin-Hungh nyei Singx Lingh njiec daaih hnangv norqc nqo nor, yaac nzopc jienv ninh. 17 Maaih qiex yiem gu'nguaaic lungh gornqv, "Naaiv se yie nyei Dorn-hnamv. Yie za'gengh a'hneiv haic ninh."

Naaiv deix i yiemc Ging-Sou gornqv daaih mengh nyei mbuox mbuo, Ziouv Yesu jiex wuom nyei leiz, yaac maaih Singx Lingh njiec taux Ninh nyei sin, Tin-Hungh yaac gornqv waac bun mienh camv haiz. Naaiv deix jauv cuotv daaih bun cing mbuo hiuv duqv gornqv, "Maaih buo dauh Ziouv benx yietc dauh Tin-Hungh hnangv." Corc maiv daan naaiv hnangv, dongh Ziouv Yesu paaiv gong bun Ninh nyei gong-zoh mbuo yaac paaiv gong bun mbuo yietc zungv sienx Ninh nyei mienh wuov zanc, yiem Matv^taai 28:19, wuov yaac hnangv naaiv nor gornqv,

19 Weic naaiv, meih mbuo oix zuqc mingh njaaux maanc fingx mienh zoux yie nyei sai-gorx. Oix zuqc dengv Die, Dorn caux Singx Lingh nyei mbuox tengx ninh mbuo jiex wuom nyei leiz.

Dongh Ziouv Yesu paaiv gong zoh mbuo mingh zunh Tin-Hungh nyei Kuv Fienx yaac tengx mienh jiex wuom nyei laiz wuov zanc, oix zuqc dengv Singx Diex, Singx Dorn caux Singx Lingh nyei mbuox tengx ninh mbuo jiex wuom nyei leiz. Yiem naaiv Ging-Sou yaac nuqv taux mbuox mbuo gornqv, "Mbuo nyei Tin-Hungh se nduqc dauh hnangv." Se Singx-Diex, Singx Dorn caux Singx Lingh gapv jienv benx yietc dauh Tin-Hungh hnangv. Mbuo buac Loz-Ngaengc Waac, yiem Nzamc^leiz^latc 6:4,

4 O I^saa^laa^en Mienh aac, muangx longx oc. Mbuo nyei Ziouv, Tin-Hungh, se nduqc dauh Ziouv hnangv. Aengx caux Maako 12:29, wuov hnangv naaiv gornqv. 29 Yesu dau, "Gauh longc jienv jiex nyei leiz se dongh naaiv. I^saa^laa^en Mienh aac, muangx longx oc. Mbuo nyei Ziouv Tin-Hungh, se nduqc dauh Ziouv hnangv.

Naaiv deix i yiemc Ging-Sou aengx gornqv mbuox mbuo, Tin-Hungh se NDUQC DAUH hnangv, maiv zeiz buo dauh, yaac maiv zeiz camv dauh.

Hnangv naaiv mbuo JIEX WUOM NYEI LEIZ se benx yietc nyungc jienv haic nyei jauv bun mbuo dauh dauh sienx Ziouv Yesu nyei mienh. Mbuo hiuv duqv JIEX LEIZ NYEI JAUV se jienv nyei. Weic naaiv mbuo cingx daaih oix bun dauh dauh maaih hnyouv oix jiex leiz nyeimienh bieqc hnyouv yaac hiuv duqv gornqv, "Jiex leiz se maaih haaix nyungc eix leiz." Mbuo jangx longx naaiv norm dornx oc.

Jiex wuom nyei leiz za'gengh jienv haic, weic zuqc Ziouv Yesu ganh yaac jiex wuom nyei leiz weic zoux ziangx nyungc zeiv bun mbuo zuotc. Weic zuqc yiem Matv^taai 3:16-17, wuov hnangv naaiv gornqv mbuox mbuo,

16 Yesu jiex leiz yiem wuom cuotv daaih wuov zanc, liemh zaih lungh nqoi. Yesu buac Tin-Hungh nyei Singx Lingh njiec daaih hnangv norqc nqo nor, yaac nzopc jienv ninh. 17 Maaih qiex yiem gu'nguaaic lungh gornqv, "Naaiv se yie nyei Dorn-hnamv. Yie za'gengh a'hneiv haic ninh."

Ziouv Yesu maiv daan zoux nyungc zeiv, jiex wuom nyei leiz bun mbuo ei jienv zoux hnangv, mv baac dongh Ziouv Yesu oix nzuonx tin-dorngh wuov zanc, Ziouv Yesu hatc dauh dauh sienx Ninh nyei mienh, oix zuqc mingh zunh kuv fienx bun maanc mienh muangx yaac tengx ninh mbuo jiex wuom nyei leiz. Weic naaiv ih zanc mbuo doqc Ziouv Yesu hatc yaac paaiv bun gong-zoh caux paaiv bun mbuo dauh dauh sienx Tin-Hungh nyei mienh oix zuqc hnangv haaix nor zoux oc. Naaiv yiem Matv^taai 28:16-20,

16 Wuov deix ziepc yietv dauh sai-gorx mingh Gaa^li^li Saengv, taux Yesu heuc ninh mbuo mingh wuov norm mbong. 17 Yietv buac Yesu ninh mbuo ziouc gueic njiec baaix ninh. Mv baac maaih deix corc hnyouv maiv dingc. 18 Yesu daaih fatv deix mbuox ninh mbuo, "Yiem lungh yiem ndau yietc zungv hatc maaz Tin-Hungh jiu bun yie mi'aqv. 19 Weic naaiv, meih mbuo oix zuqc mingh njaaux maanc fingx mienh zoux yie nyei sai-gorx. Oix zuqc dengv Die, Dorn caux Singx Lingh nyei mbuox tengx ninh mbuo jiex wuom nyei leiz, 20 yaac njaaux ninh mbuo ei nzengc yie mbuox meih mbuo zoux nyei nyungc-nyungc. Jangx jienv oc. Yie yietc liuz caux meih mbuo yiem taux baamh gen nyei nyutc zeiv jiex."

Ziouv Yesu paaiv naaiv deix waac se dongh Ziouv Yesu daic mingh buo hnoi aengx nangh daaih, ziouc mingh buangh gong-zoh mbuo yiem Gaa^li^li wuov. Yiem wuov Ziouv Yesu ziouc paaiv gong bun gong-zoh mbuo yaac bun mbuo dauh dauh sienx Yesu nyei mienh, oix zuqc mingh zunh kuv fiex bun maanc fingx mienh haih duqv sienx Ziouv Yesu.

Yaac dengv Singx Diex, Singx Dorn caux Singx Lingh nyei mbuox tengx ninh mbuo jiex wuom nyei leiz. Hnangv naaiv se benx zunh doz mienh nyei gong, benx dorh jiu baang mienh nyei gong, yaac benx dauh dauh sienx Yesu mienh nyei gong, mbuo oix zuqc njaaux mbuo nyei jiu baang mienh caux dauh dauh dongh maaih hnyouv oix jiex wuom nyei leiz nyei mienh, tengx ninh mbuo haih bieqc hnyouv, jiex wuom nyei leiz nyei eix leiz.

Mbuo dauh dauh sienx Yesu nyei mienh oix zuqc hiuv duqv gorngv, “Mbuo oix zuqc goiv hnyouv guangc mbuo nyei zuiz, yaac longc nzuih nyiemc Ziouv Yesu zoux mbuo nyei Njoux Ziouv yaac yiem hnyouv sienx Ziouv Yesu daic yiem ziepc nzaangc jaax div mbuo nyei zuiz, mbuo cingx daaih duqv njoux hnangv.” Se gorngv haaix dauh nyei hnyouv maiv sienx Ziouv Yesu zoux Njoux Ziouv, ninh yaac maiv zipv Ziouv Yesu yiem ninh nyei hnyouv, yaac maiv goiv hnyouv guangc zuiz nor, maiv gunv ninh jiex wuom nyei leiz yaac maiv haih tengx ninh duqv njoux. Jangx jienv oc, jiex wuom nyei leiz nyei jauv yaac fih hnangv nyei, ei leiz zoux se maiv haih tengx mbuo, ei leiz zoux se maiv haih njoux mbuo. Jiex wuom nyei leiz se maiv zeiz tengx mbuo hingh jiex zuiz. Sienx Yesu bangc Tin-Hungh cingx daaih haih tengx mbuo hingh jiex zuiz hnangv.

Jiex wuom nyei leiz se maiv zeiz tengx mbuo daaux gauh lingh. Sienx Yesu bangc Tin-Hungh cingx daaih haih duqv Tin-Hungh dauh mbuo nyei daaux gauh waac. Jiex wuom nyei leiz se maiv zeiz tengx mbuo hingh jiex mienv. Sienx Yesu bangc Tin-Hungh cingx daaih haih duqv Ziouv nyei qaqv tengx mbuo hingh jiex mienv hnangv. Jiex wuom nyei leiz se maiv zeiz tengx mbuo hingh jiex aapv eix nyei sic. Sienx Yesu bangc Tin-Hungh cingx daaih haih duqv Ziouv Yesu nyei qaqv tengx mbuo hingh jiex aapv eix hnangv.

Weic naaiv haaix dauh oix jiex wuom nyei leiz, cingx daaih oix hoqc hiuv jiex leiz nyei jauv cingx daaih maiv zoux dorngc Tin-Hungh. Mbuo dauh dauh sienx Tin-Hungh nyei mienh oix zuqc hiuv duqv Tin-Hungh dongh haaix dauh. Mbuo yaac oix zuqc hiuv duqv Ziouv Yesu dongh haaix dauh. Mbuo yaac oix zuqc hiuv duqv Ziouv Singx Lingh dongh haaix dauh.

Mbuo oix hoqc taux Singx Diex fai Tin-Hungh se dongh haaix dauh. Mbuo hiuv duqv Singx Diex, Singx Dorn caux Singx Lingh se dongh zeiz maanc muotc wuov dauh Ziouv. Yiem Tin-Deic Douh 1 zaang wuov gorngv mbuox mbuo, dongh cor wuov zanc maiv gaengh maaih lungh maiv gaengh maaih ndau. Naaiv Tin-Deic Douh 1 zaang se bun mbuo hiuv duqv Tin-Hungh nyei lingc, bun mbuo hiuv duqv Tin-Hungh nyei hatc maaz ndongc haaix hlo. Tin-Hungh nyei matc maaz, Tin-Hungh nyei lingc ndongc haaix camv. Weic zuqc Tin-Hungh kungx gorngv waac hnangv, maanc muotc nyei ga'naaiv ziouc cuotv daaih aqv.

I. Da'yietv “TIN-HUNGH ZA'GENGH HLO HAIC.”

Hnangv naaiv dorh jienv oix jiex wuom nyei leiz wuov deix muoz-doic doqc naaiv douc Ging-Sou muangx gaax Ging-Sou gorngv Tin-Hungh ndongc haaix hlo oc. Naaiv yiem Cuotv I'yipv 6:1-8,

1 Ziouv gorngv mbuox Mose, “Ih zanc meih oix buac yie hnangv haaix nor zoux bun Faalo Hungh. Yie oix longc yie henv haic nyei buoz aapv ninh bungx yie nyei baeqc fingx cuotv. Laaix yie nyei buoz nyei domh qaqv ninh zungv oix zunc I^saa^laa^en Mienh cuotv ninh nyei deic-bung.” 2 Tin-Hungh aengx mbuox Mose. “Yie se Ziouv. 3 Yie hinc cuotv daaih bun Apc^laa^ham, Isakc, caux Yaakopy buac, bun ninh mbuo hiuv duqv yie se Nernh Jiex nyei Tin-Hungh. Mv baac dongh yie heuc ‘Ziouv’ wuov norm mbuox, yie maiv laauc yaangh bun ninh mbuo hiuv. 4 Yie yaac caux ninh mbuo liepc jiez ngaengc waac, laengz zorqv Kaa^naa^an Deic-Bung jiu bun ninh mbuo, dongh zinh ndaangc ninh mbuo zoux kaeqv mienh yiem wuov norm deic-bung. 5 Maiv daan mbuoqc naaiv. I^saa^laa^en Mienh Zuqc I^yipv Mienh hoic zoux nouh kouv, njunh nyei qiex yie yaac haiz mi'aqv. Yie aengx jangx zuqc yie laengz jiex nyei ngaengc waac. 6 “Weic naaiv meih oix zuqc mbuox I^saa^laa^en Mienh, ‘Yie se Ziouv yaac oix dorh meih mbuo cuotv I^yipv Mienh nyei buoz-ndiev, biaux ndutv zuqc zoux nouh nyei kouv naanc. Yie oix sung yie henv haic nyei buoz jiez daaih hniev-hniev nyei dingc I^yipv Mienh nyei zuiz yaac zuoqc meih mbuo. 7 Yie oix bun meih mbuo zoux yie ganh nyei baeqc fingx yaac oix zoux meih mbuo nyei Tin-Hungh. Meih mbuo ziouc hiuv duqv yie zoux Ziouv, meih mbuo nyei Tin-Hungh, dongh dorh meih mbuo cuotv I^yipv Mienh hoic meih mbuo nyei kouv naanc. 8 Yie oix dorh meih mbuo mingh taux yie caux Apc^laa^ham, Isakc, caux Yaakopy houv jienv laengz bun ninh mbuo wuov norm deic-bung. Yie oix zorqv wuov norm deic-bung jiu bun meih mbuo, benx meih mbuo nzipc nyei buonc. Yie se Ziouv.”

IH ZANC MBUO PORV MENGH DEIX NAAIV DOUC GING-SOU OC.

Mbuo hiuv duqv yiem Mose nyei ziangh hoc fai yiem Mose wuov jaax lungh ndiev, I^yipv Deic-bung se maaih qaqv, maaih lingc nyei, butv zoih nyei deic-bung. I^yipv Mienh nyei hungh diex za'gengh

maaih lungh ndiev nyei lingc gunv jienv I^saa^laa^en Mienh zoux ninh nyei nouh. Yiem Cuotv I^yipv 6:1, wuov Tin-Hngh cingx daaih gorngv mbuo Mose. Tin-Hungh gorngv mbuox Mose, “Ih zanc meih oix buatc yie hngv haaix nor zoux bun Faalo Hungh. Yie oix longc yie henv haic nyei buoz aapv ninh bungx yie nyei baeqc fingx cuotv. Laaix yie nyei buoz nyei domh qaqv ninh zungv oix zunc I^saa^laa^en Mienh cuotv ninh nyei deic-bung.”

Naaiv se bun mbuo hiuv duqv gorngv Tin-Hungh hlo haic. Weic zuqc Tin-Hungh za'gengh hlo haic, Tin-Hungh cingx daaih haih laengz ngaengc waac bun I^saa^laa^en Mienh nqa'haav haih duqv Kaa^naa^an Deic-bung zoux ninh mbuo nyei buonc. Cuotv liuz Tin-Hungh maiv maaih haaix dauh haih laengz naaiv nyungc waac bun mienh aqv. Naaiv se Tin-Hungh hlo haic nyei qaqv. Tin-Hungh haih bun I^saa^laa^en Mienh duqv biaux cuotv I^yipv deic-bung. Se gorngv butv zoih nyei mienh yaac maaih ndau-deic jangv nyei nor, se haih laengz waac bun deix ndauh buonc ganh dauh mienh nyei. Mv baac mbuo lungh ndiev mienh, se maiv gunv butv zoih mbuov fai butv zoih haic nyei hungh diex yaac maiv haih laengz bun yietc norm deic-bung haaix dauh.

Naaiv se dongh NERNH nyei Tin-Hungh zoux nyei sic, dongh HLO haic zeix maanc muotc wuov dauh Ziouv aqv. Ih zanc aengx dorh jienv oix jiex wuom nyei leiz wuov deix doqc naaiv douc Ging-Sou yaac porv mengh mbuox ninh mbuo Tin-Hungh ndongc haaix HLO oc. Naaiv yiem Lomaa 11:33-36, yiem.

33 Tin-Hungh nyei en za'gengh hlo haic. Ninh nyei cong-mengh caux wuonh zaang ndo haic. Tin-Hungh dux nyei sic haaix dauh haih hnamv duqv zaaic? Ninh zoux nyei jauv maiv maaih haaix dauh haih samx duqv cuotv. 34 Hnangv Ging-Sou gorngv nor, “Haaix dauh hiuv duqv Tin-Hungh nyei hnyouv? Haaix dauh haih tengx ninh daav cuotv za'eix?” 35 “Haaix dauh bun jiex haaix nyungc zingh nyeic Tin-Hungh weic bun ninh oix zuqc winh?” 36 Weic zuqc Tin-Hungh zeix maanc muotc daaih. Maanc muotc kaux ninh cingx daaih haih yiem, yaac weic ninh yiem. Mbuo oix zuqc yietc liuz ceng Tin-Hungh taux maanc gouv maanc doic. Aa^men.

Naaiv douc Ging-Sou yaac njaaux taux mbuo dauh dauh oix jiex wuom nyei leiz nyei mienh, tengx mbuo hiuv duqv gorngv, “Tin-Hungh za'gengh hlo haic, maiv maaih haaix dauh haih bieqc hnyouv nzengc Tin-Hungh aqv. Maiv gunv mbuo lungh ndiev mienh haaix dauh ndongc haaix guai, mv baac maiv haih mengh baeqc Tin-Hungh nyei jauv-louc. Mbuo maiv maaih haaix dauh haih tengx Tin-Hungh ca'laangh haaix nyungc.

Weic zuqc Tin-Hungh nyei liangv jiex caux hungh heic jiex nyei ga'naaiv hungh heic jiex nyei dorngx mbuo lungh ndiev mienh zungv maiv haih bieqc hnyouv. Mbuo baamh mienh haaix zanc maaih sic fai maaih nyaav nyei jauv nor, mbuo zungv lorz guai nyei maaih congh mengh nyei mienh daaih tengx mbuo daav za'eix mbenc mbuo nyaav nyei sic aqv. Ging-Sou gorngv, dongh mbuo lungh ndiev guai jiex nyei mienh, dongh mbuo lungh ndiev mienh funx congh mengh longx jiex maaih lamh longc jiex nyei mienh. Nyungc-nyungc yiem naaiv seix zaangc buangh nyei sic ninh mbuo zungv haih tengx mbuo benc sung nzengc nyei mienh. Mv baac taux Tin-Hungh nyei nza'hmien nor, yietc nyungc ninh mbuo yaac maiv haih tengx aqv.

Naaiv deix jauv cingx daaih tengx mbuo haih bieqc hnyouv HLO haic nyei Tin-Hugh gauh longx. Mv gorngv haaix nyungc camv, mbuo kungc mangc Tin-Hungh zeix daaih nyei ga'naaiv hnangv mbuo zungv hnamv maiv mengh baeqc aqv. Meih mbuo hiuv duqv mbiungc yiem haaix ndortv daaih nyei fai? Tin-Hungh hnangv haaix nor zoux cuotv daaih? Mbuo kungx hnamv taux naaiv deix jauv mbuo zungv hiuv duqv Tin-Hungh dongc haaix nyei HLO aqv.

II. “TIN-HUNGH NYEI DOMH QAQV”

Tin-Hungh nyei DOMH QAQV se yiem Cuotv I^yipv 7:14-12:36.

Tin-Hungh ganh bun Ninh nyei bou fiev jienv naaiv deix mbuoqc horngh nyei sic cuotv daaih njaaux mbuo, bun mbuo hiuv duqv kungx Tin-Hungh ganh maaih domh qaqv zoux naaiv nyungc mbuoqc horngh sic hnangv. Tin-Hungh bun Ninh nyei domh qaqv Mose, Mose ziouc ei jienv Tin-Hungh nyei waac zoux.

Nai^aa Ndaaih ziouc benx **NZIAAMV** weic bun I^yipv mienh hiuv, yaac weic njaaux mbuo, bun mbuo hiuv duqv Tin-Hungh maaih domh qaqv zoux nyungc-nyungc mbuoqc horngh nyei sic. (Cuotv I^yipv 7:14-24) Tin-Hungh aengx bun domh qaqv Mose caux Aalon zoux da'nyeic nzunc mbuoqc horngh nyei sic. Da'nyeic nyungc mbuoqc horngh nyei sic Tin-Hungh nyei domh qaqv bun **GAENGV FAANV** cuotv daaih buangv nzengc I^yipv deic-bung. Gaengv yiem buangv buonc-buonc mienh nyei biauv, yiem buangv coux yiem buangv gen, maiv maaih dorngx caaiv maiv maaih dorngx zueiz. Hnaangx-dieh, hnaangx-caeng gaengv yaac buangv nzengc. Tin-Hungh nyei domh qaqv zoux da'faam nzunc mbuoqc horngh nyei sic, se **GAENG-MBUNG FAANV** daaih buangv nzengc I^yipv Deic-bung. Dauh dauh I^yipv Mienh nyei sin caux saeng-kuv zuqc naaiv deix gaeng-mbung ngaatc kouv haic. Tin-Hungh nyei domh qaqv zoux Da'feix nyungc mbuoqc horngh nyei sic se **MUNGZ FAANV**. Mungz faanv daaih yiem buangv nzengc I^yipv Deic-bung, yiem buangv I^yipv Mienh nyei norm-norm biauv, biormh buangv nzengc ninh mbuo nyei lai hnaangx, ninh mbuo za'gengh kouv haic. Tin-Hungh nyei domh qaqv zoux da'hmz nyungc mbuoqc horngh nyei sic, se **BUTV**

WUON. Ziangh norm I'yipv Deic-bung mienh nyei saeng-kuv butv wuon daic zutc nzengc. Mv baac I'saa^laa^en Mienh nyei saeng-kuv Tin-Hungh maiv bun daic yietc dauh. Faalo hungh bun mienh mingh zaah liuz yaac hiuv duqv I'saa^laa^en Mienh nyei saeng-kuv maiv butv wuon. Naaiv se Tin-Hungh nyei domh qaqv aqv.

Tin-Hungh nyei domh qaqv zoux da'luoqc nzunc mbuoqc horngh nyei sic, se **ZIANGH ZUEIH.** Ziangh norm I'yipv deic-bung nyei Mienh nyei sin ziangh zueih, liemh zoux faatv wuov deix mienh ganh yaac ziangh zueih kouv gor maiv haih mingh buangh Mose mbuo aqv. Tin-Hungh nyei domh qaqv zoux da'cietv kang mbuoqc horngh nyei sic, se **DUIH DOMH BOROC.** Naaiv yaac dongh cuotv liuz Tin-Hungh maiv maaih haaix dauh haih zoux nyei sic. Tin-Hungh nyei domh qaqv zoux da'betv nzunc mbuoqc horngh nyei sic, se **JOPV-NYEIC FAANV.** Jopv-nyeic faanv daaih zorqv I'yipv Mienh nyei ga'naih zuangx nyanc nzengc, lomc zaangc nyei miev jopv-nyeic yaac nyanc nzengc maiv maaih yietv nyungc aqv. Jopv-nyeic faanv nyei javv nor, mbuo Iu-Mienh yaac maaih deix duqv buangh liuz zuqc jopv nyanc nzengc mbiauh, nyanc nzengc maeqc ziouc zuqc ngorc hnaangx kouv haic. Naaiv deix sic cuotv daaih njaaux mbuo, tengx mbuo hiuv duqv Tin-Hungh nyei qaqv za'gengh hlo haic. Tin-Hungh nyei domh qaqv zoux da'juov nzunc mbuoqc horngh nyei sic, se **LUNGH HMUANGX.** I'yipv Mienh buangh zuqc lungh mapv maengh mapv hmuangx nyei buo hnoi. Mv baac Tin-Hungh bun njang ziux jienv ninh nyei baeqc fingx I'saa^laa^en Mienh nyei. Se gorngv mbuo hnamv taux maaih i qongx biauv, maaih njongc nqaevv jienv, maaih qongx njang maaih qongx hmuangx nor mbuo haih bieqc hnyouv nyei. Mv baac yiem gaeng-kaa ndau maiv maaih haaix nyungc nqaevv, mv baac maaih qongx ndau njang maaih qongx ndau hmuangx. Naaiv nyungc javv cuotv liuz Tin-Hungh maiv maaih haaix dauh haih zoux aqv.

Hnangv naaiv mbuo cingx daaih gauh bieqc hnyouv longx Tin-Hungh nyei domh qaqv se ndongc haaix hlo. Tin-Hungh nyei domh qaqv zoux da'ziepc nzunc mbuoqc horngh nyei sic, se I'yipv Mienh nyei **DORN-LA'GAUV** zuqc daic. Mbuo yaac hiuv duqv, mbuo lungh ndiev mienh haih buangh wuon-baengc daic nyei. Mv baac wuon-baengc se maiv zeiz hnangv Tin-Hungh zoux nyei sic. Tin-Hungh zoux naaiv kang sic se kungx dorn-hlo daic hnangv. Yaac maiv zeiz buonc baav mienh nyei dorn-hlo daic hnangv, mv baac buonc-buonc I'yipv mienh nyei dorn-hlo zungv daic nzengc mi'aqv. Naaiv yaac bun mbuo hiuv dinge gorngv, Tin-Hungh za'gengh peix fuc haic nyei Tin-Hungh, maiv maaih haaix dauh maaih domh qaqv hnangv mbuo nyei Tin-Hungh aqv. Cuotv liuz Tin-Hungh maiv maaih ganh dauh zienh haih bun ndoqv fai koiv nqoi daaih benx javv nqaai bun mienh yangh.

Zeiz nyei, cuotv liuz Tin-Hungh maiv maaih haaix dauh haih zoux aqv. Kungx Tin-Hungh ganh haih bun koiv, haih bun ndoqv nqoi daaih zoux javv bun mienh jiex hnangv. Weic zuqc yiem Cuotv I'yipv 14:15-16, wuov hnangv naaiv gorngv mbuox mbuo. *15 Ziouv gorngv mbuox Mose, "Meih weic haaix diuc heuc jienv tov yie? Gunv mbuox I'saa^laa^en Mienh hungx jienv wuov ndaangc mingh aqv. 16 Sung meih nyei biaav-mbiaac jiex koiv gu'nguaaic, uom ziouc bun nqoi bun I'saa^laa^en Mienh yangh javv-nqaai jiex wuov ngaanc ziqc koiv.*

Tin-Hungh gorngv mbuox liuz Mose, Mose ziouc ei jienv zoux, Tin-Hungh ziouc bun koiv nyei wuom nqoi daaih benx javv-nqaai bun I'saa^laa^en Mienh jiex ziqc koiv duqv ziouc duqv ninh mbuo nyei maengc cuotv. Naaiv se Tin-Hungh nyei domh qaqv njoux Ninh nyei mienh nyei maengc aqv. Hnangv naaiv mbuo ziouc hiuv dinge dongh Maako 10:27, wuov hnangv naaiv gorngv, *27 Yesu mangc jienv ninh mbuo aengx gorngv, "Baamh mienh maiv haih njoux ganh mv baac Tin-Hungh haih nyei. Maanc sic Tin-Hungh haih zoux duqv nyei."* Hnangv naaiv buatc Ging-Sou gorngv nyei waac caux Tin-Hungh zoux nyei sic za'gengh doix nzengc mi'aqv.

III. "TIN-HUNGH DONGH ZANC YIEM NORM-NORM DORNGX"

Tin-Hungh dongh dangh yiem tin-dorngh caux baamh gen. Dongh wuov norm ziangh hoc, Tin-Hungh yiem mungv yaac yiem lomc. Dongh wuov norm ziangh hoc, Tin-Hungh yiem Dongh bung yaac yiem Naamh bung. Dongh wuov norm ziangh hoc, Tin-Hungh yiem Taiv-Guoqv yaac yiem Janz-Zei Guoqv. Dongh wuov norm ziangh hoc, Tin-Hungh yaac yiem norm-norm guoqv. Corc maiv daan yiem norm-norm guoqv hnangv, mv baac aengx caux dauh dauh sienx Ninh nyei mienh dongh yiem.

Zeiz nyei, weic zuqc mbuo maaih ziex baeqv fingx mienh yiem naaiv lungh ndiev. Yaac maaih ziex cin ziux mienh sienx Ziouv Tin-Hungh benx Ziouv nyei naamh nyouz. Maaih mienh camv haic hnoi-hnoi dongh zanc daaux gauv, mv baac Tin-Hungh haih muangx yaac haih dau duqv dauh dauh mienh nyei daaux gauv waac nyei. Yaac dongh wuov norm ziangh hoc, Tin-Hungh yiem dauh dauh mienh nyei nza'hmien tengx ninh mbuo.

Weic zuqc yiem Singx Nzung 139:7-12, wuov hnangv naaiv gorngv, *7 Yie mingh haaix haih simv duqv ndutv Ziouv nyei Singx Lingh? Maaih haaix norm dorngh yie haih biaux duqv ndutv Ziouv nyei nza'hmien? 8 Se gorngv yie mingh taux tin-dorngh Ziouv yaac yiem wuov, se gorngv*

ye dimcoux yiem ndo haic nyei dornngx Meih yaac yiem wuov. 9 Se gorngv yie jiez sin nziouv nyei, mingh yiem wuov ngaanc ziqc koiv, 10 mv baac Meih nyei buoz dorh jienv yie, Meih nyei mbiaauc jieqv buoz nanv jienv yie zietc nyei. 11 Se gorngv yie gorngv, Hmuangx za'gengh oix bingx jienv yie, caux njang yaac benx hmuangx huing gormx yie. 12 Maiv gunv hmuangx mv baac Meih buatc njang nyei, lung hmuonz zanc mv baac Meih buatc hngang mba'hnoi ziux jienv njang nor.

Naaiv deix Ging-Sou njaaux mbuo, bun mbuo hiuv duqv maiv zengc yietc norm dornngx, dongh Tin-Hungh maiv taux nyei dornngx aqv. Maiv gunv yiem lung fai yiem ndau, fai yiem koiv-ndiev ndo haic nyei dornngx hmuangx haic nyei dornngx yaac maiv maaih yietc norm dorngh haih bingx duqv Tin-Hungh jienv. Naaiv yaac benx Tin-Hungh nyei domh qaqv, weic zuqc Tin-Hungh haih dongh dangh yaac dongh norm ziangh hoc, yiem norm-norm dornngx, yaac haih dongh dangh zoux nyungc-nyungc sic. Naaiv deix yietc zungv nyei jauv, mbuo lung ndiev mienh maiv maaih haaix dau haih hngangv naaiv nor zoux naaiv deix sic.

IV. "TIN-HUNGH HIUV NZENGC NYUNGC-NYUNGC"

Yiem Matv^taai 10:29-30, wuov hngangv naaiv gorngv mbuox mbuo yaac njaaux mbuo, "29 I norm norqc meix maaic duqv yietc norm dongh zinh hngangv. Mv baac cuotv liuz meih mbuo nyei Zangc Diex nyei eix, yietc norm norqc meix maiv ndortv njiec ndau. 30 Liemh meih mbuo nyei mba'biei, Tin-Hungh zungv saauv nzengc mi'aqv."

Naaiv deix i yiemc Ging-Sou tengx mbuo hiuv duqv gorngv norm-norm norqc meix Tin-Hungh yaac hiuv nzengc, yaac goux jienv norm-norm norqc meix nyei. Mienh muoz doic aac, mbuo dau dau mienh nyei m'nqorngv zungv maaih mba'biei camv haic, maaih deix nyei mba'biei gauh camv deix maaih deix, maaih deix mba'biei gauh zoqc deix hngangv. Maaih deix se m'nqorngv njang nyei laaix mba'biei bioh nzengc aengx zengc deix baav hngangv, mv baac mbuo corc saauv maiv mengh baeqc. Mbuo liemh maiv zuqc saauv ziangh biau mienh fai ziangh laangz mienh nyei mba'biei aqv. Kungx nduqc dau nyei mbuo zungv saauv maiv hiuv, saauv maiv mengh aqv. Mv baac Tin-Hungh maiv zeiz hngangv mbuo. Tin-Hungh maiv zeiz hiuv duqv nduqc dau mienh nyei mba'biei hngangv, mv baac yiem lung ndiev nyei maanc fingx mienh, zix cin ziux nyei mienh nyei mba'biei Tin-Hungh hiuv nzengc mi'aqv.

Weic naaiv mbuo cingx daaih oix zuqc gamh nziex Tin-Hungh, oix zuqc taaih Tin-Hungh muangx Tin-Hungh nyei waac yaac ei jienv zoux. Mbuo hiuv duqv Tin-Hungh hiuv nzengc nyungc-nyungc sic, Tin-Hungh hiuv nzengc yaac buatc nzengc mbuo dau dau mienh nyei hnyouv mi'aqv. Hngangv naaiv mbuo jiex wuom nyei leiz mbuo oix zuqc ziepc zuoqv hnyouv caux Tin-Hungh, mv zeiz longc hmien-minc fai longc beih zaangc zoux hngangv.

Dongh meih mbuo maaih hnyouv yaac dingc hnyouv ziepc zuoqv nyei oix jiex wuom nyei leiz nyei mienh se longx haic aqv, weic muangx Ziouv Yesu paaiv nyei waac, ziouc oix duqv ninh ceix bun nyei en. Zeiz nyei, weic zuqc jiex wuom nyei leiz se dongh yietc nyungc jauv mbuo muangx Tin-Hungh nyei waac cingx daaih ei jienv Ging-Sou njaaux nyei waac zoux, naaiv Tin-Hungh zungv oix ceix fuqv bun nyei.

Yiem Matv^taai 6:8, wuov yaac hngangv naaiv gorngv,

8 Maiv dungx hngangv ninh mbuo nor zoux. Meih mbuo maiv gaengh tov, meih mbuo nyei Zangc Diex zungv jaa-ndaangc hiuv duqv meih mbuo qiemx zuqc nyei nyungc-nyungc. Ging-Sou gorngv, "Mbuo dau dau yiem hnyouv hnamv nyei jauv maiv gaengh gorngv, mv baac Tin-Hungh hiuv nzengc mi'aqv." Hngangv naaiv mbuo cingx daaih oix zuqc jaa gamh nziex Tin-Hungh, oix zuqc jaa taaih Tin-Hungh, jaa oix zuqc muangx Tin-Hungh nyei waac weic zuqc mbuo yiem hnyouv hnamv nyei sic Tin-Hungh jaa-ndaangc hiuv nzengc mi'aqv, maiv maaih haaix nyungc haih bingx duqv Tin-Hungh jienv aqv.

V. "TIN-HUNGH SE CING-NZENGC HAIC"

Hngangv naaiv mbuo aengx koi Ging-Sou daaih caux jienv oix jiex wuom nyei leiz wuov deix juangc jienv doqc muangx gaax Ging-Sou hngangv haaix gorngv oc. Naaiv yiem Lewi 11:44-45, aengx caux 1 Bide 1:15-16. *44 Yie zoux Ziouv, meih mbuo nyei Tin-Hungh. Meih mbuo oix zuqc saax ganh cing-nzengc daaih weic zuqc yie se cing-nzengc. Maiv dungx laaix nyornng ndau nyei haaix nyungc ga'naaiv bun ganh maaih uix. 45 Yie zoux Ziouv, dongh dorh meih mbuo yiem I'yipv Deic-Bung cuotv daaih weic zoux meih mbuo nyei Tin-Hungh. Weic naaiv meih mbuo oix zuqc cing-nzengc Weic zuqc yie se cing-nzengc nyei. 15 Heuc meih mbuo daaih wuov dau se cing-nzengc nyei. Yiem meih mbuo zoux nyei nyungc-nyungc sic meih mbuo yaac oix zuqc hngangv ninh nor, cing-nzengc. 16 Weic zuqc Ging-Sou gorngv, "Meih mbuo oix zuqc cing-nzengc weic zuqc yie se cing-nzengc nyei." Naaiv douc Ging-Sou gorngv Tin-Hungh cing-nzengc haic. Tin-Hungh maiv maaih zuiz, Tin-Hungh maiv maaih waaic, maiv maaih orqv nyei hnyouv. Weic zuqc Tin-Hungh cing-nzengc, Tin-Hungh cingx nzornng haic zuiz, nzornng haic waaic nyei sic. in-Hungh se cing-nzengc, mv baac mbuo lung ndiev mienh se laih hlopv, laaix mbuo maaih zuiz. Tin-Hungh cing-nzengc haic, hngangv naaiv*

mbuo yaac oix zuqc zoux cing-nzengc weic zuqc mbuo benx Tin-Hungh nyei naamh nyouz. Weic zuqc Tin-Hungh nzornng zuiz, nzornng waaic nyei sic, mbuo ziouc oix zuqc guangc maiv zoux zuiz, maiv zoux waaic sic, cingx haih duqv caux Tin-Hungh horpc hnyouv.

VI. “TIN-HUNGH SE YIETC LIUZ YIEM”

Yiem Singx Nzung 90:2, wuov hnangv naaiv gorngv,

Dongh zornng maiv gaengh cuotvc seix nyei ziangh hoc fai Meih maiv gaengh zeix lungh ndauh wuov zanc, Meih se dongh yiem yietc liuz mingh taux yietc liuz wuov dauh Tin-Hungh.

Mienh muoz doic aac, cuotv liuz Tin-Hungh maiv maaiah haaix dauh haih yietc liuz yiem. Nyungc-nyungc yiem naaiv lungh ndiev zungv yiem douc baav hnangv jiex nzengc aqv. Yiem Laauc Yaangh 22:13, wuov yaac hnangv naaiv nor gorngv,

13 Yie zoux Aanfaa caux O^me^gaa, Daauh Dauh caux Nqa^haav Laai Wuov Dauh, zoux Gorn yaac zoux Setv Mueiz wuov dauh.

Naaiv yiemc Ging-Sou yaac gorngv mbuox mbuo, Tin-Hungh ganh zoux Gorn yaac zoux Dueiv, dongh jiex gorn yaac dongh Setv Mueiz wuov dauh. Eix leiz se dongh maiv gaengh maaiah lungh maaiah ndau nyei ziangh hoc Tin-Hungh zungv yiem jienv aqv. Dongh Tin-Hungh maiv gaengh zeix maanc muotc nyei ziangh hoc, dongh Tin-Hungh maiv gaengh zeix saeng-kuv, dongh Tin-Hungh gaengh zeix mienh maanh nyei ziangh hoc Tin-Hungh zungv yiem jienv, ziangh jienv nyei.

Setv Mueiz nyei eix leiz se taux setv mueiz nyei hnoi, dongh naaiv lungh ndiev jiex nzengc nyei ziangh hoc, dongh yiem naaiv baamh gen, dongh yiem naaiv lungh diev nyei nyungc-nyungc zuqc mietc nzengc nyei ziangh hoc, Tin-Hungh corc yiem jienv nyei. Eix leiz se Tin-Hungh nyei seix zeiv maiv maaiah dorngx dorng, maiv maaiah dorngx jomc. Tin-Hungh nyei jiepc zaangv yietc liuz maiv haih buangv, Tin-Hungh nyei nyutc zeiv yietc liuz maiv haih jiex. Weic zuqc Tin-Hungh maiv zuqc cuotv seix, Tin-Hungh ziouc maiv haih jiex seix yaac maiv haih daic. Mbuo baamh mienh fai lungh ndiev mienh se dauh dauh oix zuqc cuotv seix daaih yaac oix zuqc hlo. Hlo daaih yaac oix zuqc gox, gox daaih ziouc oix zuqc daic aqv. Naaiv deix yietc zungv tengx mbuo jangx jienv gorngv Tin-Hungh yietc liuz maiv goiv yienc, Tin-Hungh yietc liuz ziangh jienv nyei.

VII. SINGX DORN

Yesu Giduc se Tin-Hungh nyei Dorn. Tin-Hungh nyei Dorn se dongh Singx Dorn aqv. Weic zuqc Ziouv Yesu se maaiah zix norm mbuox nyei. YESU se Gikc waac, eix leiz gorngv Njoux Ziouv. Maaiah norm heuc **GIDUC** se Gikc waac. Eix leiz se “**Orn daaih wuov dauh.**” Naaiv yiem Lugaa 2:11,

11 Ih hnoi, yiem Ndaa^witv nyei mungv, meih mbuo nyei Njoux Ziouv cuotv seix daaih aqv, dongh Ziouv Giduc. Matv^taai 1:16, 16 Yaakopv zoux Yosepv nyei die. Yosepv se Maa^li^yaa nyei nqox. Maa^li^yaa zoux Yesu nyei maa. Yesu dongh mienh heuc Giduc wuov dauh.

Yesu Giduc nyei eix leiz se “**Tin-Hungh paaiv daaih zoux Njoux Ziouv wuov Dauh**” Aengx maaiah norm mbuox heuc “**ME^SI^YAA**” se Hipv^lu waac, eix leiz se “**Orn daaih wuov dauh.**” Maaiah norm mbuox heux “**I^MAA^NU^EN.**” Eix leiz se “Tin-Hungh caux mbuo yiem” Naaiv deix Ging-Sou yiem Yo^han 1:41, caux Matv^taai 1:23 wuov hnangv naaiv gorngv,

41 An^ndaa^lu liemh zehi mingh lorz ninh nyei gorx, Simon Bide, mbuox ninh, “Yie mbuo buat Me^si^yaa aqv loh!” (Me^si^yaa wuov joux waac nyei eix leiz se Giduc.) 23 “Maaiah dauh sieqv maiv gaengh nziaauc jiex dorn, mv baac ninh oix zuqc maaiah norm sin, oix duqv dauh dorn daaih. Ninh mbuo yaac oix cuotv mbuox heuc I^maa^nu^en.” Eix leiz se “Tin-Hungh caux mbuo yiem.”

Mbuo duqv haiz Ging-Sou gorngv taux Ziouv Yesu nyei mbuox caux mbuox nyei eix leiz, mbuox liuz mbuo aqv. Se gorngv maiv maaiah haaix nyungc, kungx Ziouv Yesu nyei mbuox hnangv, mv baac bun mbuo maaiah lamh hnamv dorngc nyei. Zeiz nyei, weic zuqc Ziouv Yesu nyei mbuox se Njoux Ziouv, dongh Orn Daaih Wuov Dauh, yaac heuc Tin-Hungh caux mbuo yiem. Mbuo hiuv duqv Tin-Hungh se dongh hnamv mbuo lungh ndiev mienh wuov dauh Ziouv, yaac dongh njoux dauh dauh sienx Ninh nyei mienh wuov dauh Ziouv. Tin-Hungh nyei hnyouv ndongc naaic longx, se gorngv mbuo duqv caux Tin-Hungh yiem nor, mbuo za'gengh maaiah orn lorqc haic. Tin-Hungh nyei mbuox, Ziouv Yesu nyei mbuox zungv porv mengh Tin-Hungh ndongc haaix korh lienh mbuo, porv mengh Ziouv Yesu ndongc haaix nyei hnamv mbuo. Weic naaiv cingx daaih haaix dauh sienx kaux Tin-Hungh, bangc Tin-Hungh muangx nzengc Tin-Hungh nyei waac yaac ei jienv zoux nor, ziouc oix duqv Tin-Hungh nyei orn-lorqc.

Hnangv naaiv ih zanc mbuo juangc jienv doqc naaiv deix Ging-Sou oc. Naaiv yiem Yo[^]han 1:1-18, 1 Zinh ndaangc maiv gaengh zeix lungh zeix ndau wuov zanc, Doz zungv yiem nyei. Doz yaac caux Tin-Hungh yiem yaac dongh Tin-Hungh. 2 Zinh ndaangc yiem gorn wuov zanc, Doz caux Tin-Hungh yiem. 3 Tin-Hungh longc Doz zeix cuotv maanc muotc. Maiv maaih yietc nyungc Tin-Hungh maiv longc Doz zeix. 4 Doz zoux gorn-nyuonh bun nyungc-nyungc maaih maengc ziangh. Naaiv nyungc maengc dorh njang daaih ziux baamh mienh. 5 Njang yaac ziux bieqc hmuangx nyei dornx, hmuangx yaac maiv haih hingh njang. 6 Tin-Hungh paaiv dauh mienh daaih, mbuox heuc Yo[^]han. 7 Yo[^]han daaih tengx njang zoux zornz-zengx bun maanc mienh muangx yaac sienx. 8 Ninh ganh maiv zeiz zoux naaiv njang. Ninh kungx tengx njang zoux zornz-zengx hnangv. 9 Naaiv njang se zien haic nyei njang yaac bieqc baamh gen ziux mienh maanh. 10 Naaiv Doz yiem baamh gen. Tin-Hungh longc ninh zeix baamh gen, mv baac baamh mienh zieqv maiv duqv ninh. 11 Ninh daaih taux ninh ganh nyei deic-bung, ninh ganh nyei mienh yaac maiv zipv ninh. 12 Mv baac zipv ninh yaac sienx kaux ninh wuov deix, ninh bun maaih leiz benx Tin-Hungh nyei naamh nyouz. 13 Ninh mbuo benx Tin-Hungh nyei naamh nyouz se maiv zeiz ei pouh tong nyei za'eix yungz nyei, se maiv zeiz maaih baamh mienh zoux die nyei. Tin-Hungh ganh zoux ninh mbuo nyei die. 14 Doz benx dauh baamh mienh yiem mbuo mbu'ndongx. Ninh maaih en hlo haic, yaac bun mbuo hiuv duqv nzengc Tin-Hungh nyei zien leiz. Yie mbuo duqv buatc ninh nyei njang-laangc, se weic zuqc ninh zoux Tin-Hungh nyei ndoqc Dorn zipv daaih nyei njang-laangc.

15 Yo[^]han yaac tengx ninh zoux zornz-zengx. Ninh heuc jienv gornv, "Yie gornv jiex nyei wuov dauh se dongh naaiv dauh aqv. Yie daaih ndaangc, ninh nqa'haav daaih mv baac ninh zoux gauh hlo yie, weic zuqc yie maiv gaengh cuotv seix ninh zungv yiem nyei." 16 Ninh nyei en hlo haic ziouc zanc-zanc ceix fuqv bun mbuo. 17 Tin-Hungh longc Mose bun mbuo duqv leiz-latc, mv baac longc Yesu Giduc bun mbuo duqv ninh nyei en caux zien leiz. 18 Maiv maaih haaix dauh buatc jiex Tin-Hungh. Kungx maaih ninh nyei ndoqc Dorn, dongh yiem Zangc Diex nyei ga'hlen wuov dauh, bun mbuo hiuv duqv Tin-Hungh hnangv.

Ih zanc mbuo aengx daaux nqaang mingh porv mengh mbuo juangc jienv doqc jiex daaih naaiv deix Ging-Sou oc. Da'yietv caux da'nyeic yiemc gornv, "Zinh ndaangc maiv gaengh zeix lungh zeix ndau wuov zanc, Doz zungv yiem nyei. Doz yaac caux Tin-Hungh yiem yaac dongh Tin-Hungh." Zinh ndaangc yiem gorn wuov zanc, Doz caux Tin-Hungh yiem. Naaiv yiemc Ging-Sou tengx mbuo hiuv duqv gornv, "Doz" se Ziouv Yesu ganh aqv. Ziouv Yesu yaac caux Tin-Hungh yiem, yaac dongh Tin-Hungh. Naaiv yiemc Ging-Sou gornv, Doz caux Tin-Hungh yiem yaac dongh Tin-Hungh. Zeiz nyei, se Ziouv Yesu caux Tin-Hungh yiem, Ziouv Yesu yaac dongh Tin-Hungh. Hnangv naaiv Ging-Sou cingx daaih gornv Singx Diex, Singx Dorn caux Singx Lingh se benx yietc dauh Tin-Hungh hnangv.

Mbuo se yietc zungv baamh mienh hnangv, mbuo cingx daaih maiv haih hiuv Ging-Sou maiv nzengc. Gornv taux buo dauh Ziouv benx yietc dauh Tin-Hungh, mbuo zungv maiv haih bieqc hnyouv aqv. Mv baac mbuo haih sienx duqv nyei. Weic zuqc Tin-Hungh haih zoux duqv maanc nyungc sic nyei.

Tin-Hungh nyei waac yiem Ging-Sou wuov yaac joux-joux zien nyei. M'daaih hnangv mbuo mangc maiv buatc nziaaux, mv baac mbuo dauh dauh zungv hiuv duqv maaih nziaaux nyei. Mbuo yaac mangc maiv buatc buo dauh Ziouv benx yietc dauh Tin-Hungh, mv baac mbuo hiuv duqv Tin-Hungh zungv hnangv nziaaux nor ziangh jienv nyei. 80B Zeiz nyei, weic zuqc mbuo maaih Tin-Hungh zeix daaih nyei maanc muotc tengx mbuo zoux zornz-zengx gornv Tin-Hungh, yiem jienv nyei, Tin-Hungh ziangh jienv nyei, m'daaih hnangv mbuo mangc maiv buatc nziaaux, mv baac mbuo hiuv duqv maaih nziaaux nyei. Weic zuqc mbuo buatc nziaaux buonc ga'naaiv yaac buonc mbuo. Tin-Hungh longc Doz zeix cuotv maanc muotc. Maiv maaih yietc nyungc Tin-Hungh maiv longc Doz zeix.

Da'faam yiem Ging-Sou gornv, Tin-Hungh longc Doz zeix maanc muotc nyei eix-leiz se Ziouv Yesu caux jienv Tin-Hungh juangc jienv zeix maanc muotc aqv.

Da'feix caux da'hmv yiemc gornv, "4 Doz zoux gorn-nyuonh bun nyungc-nyungc maaih maengc ziangh. Naaiv nyungc maengc dorh njang daaih ziux baamh mienh. 5 Njang yaac ziux bieqc hmuangx nyei dornx, hmuangx yaac maiv haih hingh njang." Mbuo lungh ndiev maanc fingx mienh, maanc horngh saengkuv maaih maengc ziangh se weic zuqc Ziouv Yesu zoux mbuo nyei maengc nyei gorn-nyuonh hnangv, mv zeiz nor, mbuo maiv maaih yietc nyungc haih maaih maengc yiem naaiv lungh ndiev aqv. Ziouv Yesu se njang. Ziouv Yesu zoux njang ziux bieqc baamh gen. Baamh gen se mbuo lungh ndiev mienh aqv. Maaih Ziouv Yesu nyei njang ziux jienv mbuo lungh ndiev mienh, mbuo lungh ndiev mienh cingx daaih haih hiuv duqv simv waaic nyei jauv. Maaih Ziouv Yesu nyei njaang ziux jienv mbuo, mbuo cingx daaih haih hiuv duqv goiv hnyouv sienx Yesu cingx haih zoux horpc Tin-Hungh nyei hnyouv.

Mbuo maaih Ziouv Yesu nyei njang ziux jienv mbuo, mbuo cingx hiuv duqv haaix nyungc longx fai waaic.

Da'luoqc caux da'cietv yiemc gornv, "6 Tin-Hungh paaiv dauh mienh daaih, mbuox heuc Yo[^]han. 7 Yo[^]han daaih tengx njang zoux zornz-zengx bun maanc mienh muangx yaac sienx." Yo[^]han se Tin-

Hungh paav daaih zoux njang nyei zorn-g-zengx mienh. Njang se Ziouv Yesu ganh aqv. Zeiz nyei, Tin-Hungh paav Yo^han daaih ndaangc weic oix porv mengh bun maanc fingx mienh hiuv duqv Ziouv Yesu se dongh maanc mienh nyei Njoux Ziouv. Haaix dauh sienx kaux Ziouv Yesu ziouc maiv zuqc dingc zuiz.

Da'betv caux da'juov yiemc gorngv, "8 Ninh ganh maiv zeiz zoux naaiv njang. Ninh kungx tengx njang zoux zorn-g-zengx hnangv. 9 Naaiv njang se zien haic nyei njang yaac bieqc baamh gen ziux mienh maanh." Yo^han se benx Tin-Hungh nyei ziepc zuoqv bou. Yo^han maiv nduov mienh gan ninh yaac maiv nduov mienh sienx ninh, mv baac ninh oix nuqv mbuox mienh gan Ziouv Yesu, ninh oix nuqv mbuox mienh sienx Ziouv Yesu hnangv.

Weic zuqc Yo^han ganh gorngv, "Yie maiv zeiz njang, yie maiv zeiz Ziouv Yesu. Yie daaih tengx Ziouv Yesu zoux zorn-g-zengx hnangv" Zien njang se zien Njoux Ziouv, maiv zeiz jaav nyei zienh. Weic zuqc Ziouv Yesu se dongh zien wuov dauh Njoux Ziouv, Ziouv Yesu cingx daih haih tiuv mbuo nyei maengc. Zeiz nyei, haaix dauh duqv Ziouv Yesu nyei njang ziux taux ninh, ninh ziouc haih gorngv zien waac zoux zorn-g-zengx weic bun mienh hiuv duqv Ziouv Yesu hnangv. Ninh yaac haih bieqc hnyouv Ziouv Yesu nyei Kuv Fienx ziouc haih sienx Yesu Giduc ziouc duqv yietc liuz nyei maengc aqv.

Da'ziepc caux ziepc yietv yiem gorngv, "10 Naaiv Doz yiem baamh gen. Tin-Hungh longc ninh zeiz baamh gen, mv baac baamh mienh zieqv maiv duqv ninh. 11 Ninh daaih taux ninh ganh nyei deic-bung, ninh ganh nyei mienh yaac maiv zipv ninh."

Mbuo dauh dauh mienh se yiem Tin-Hungh nyei buoz-dauh cuotv daaih. Weic zuqc Tin-Hungh longc Ziouv Yesu zeiz Aa^ndam caux Haawaa daaih mbuo maanc mienh cingx yiem ninh mbuo cuotv daaih. Laaix Saadaan nduov mbuo, laaix mbuo maaiah orqv maaiah waaic nyei hnyouv, mbuo lungh ndiev mienh maaiah camv haic doix-dekc Ziouv Yesu, maiv oix sienx Ziouv Yesu. Ging-Sou gorngv, Ziouv Yesu daaih taux Ninh ganh nyei deic-bung Ninh ganh nyei mienh maiv zipv Ninh se dongh naaiv aqv. Zinh ndaangc Ziouv Yesu yiem Gaa^li^li, yiem I^saa^laa^en nyei ziangh hoc, dongh Ninh cuotv seix yiem baamh gen nyei dorngx, mv baac ninh mbuo yaac maaiah camv haic maiv zipv Ziouv Yesu. Mbuo yiem naaiv lungh ndiev norm-norm guoqv nyei mienh yaac fih hnangv nyei yietc zungv Ziouv Yesu ganh zeiz daaih, mv baac mbuo lungh ndiev mienh camv haic maiv zipv Ziouv Yesu.

Mv baac zipv Ziouv Yesu yaac sienx kaux Ziouv Yesu wuov deix, Ziouv Yesu bun maaiah leiz benx Tin-Hungh nyei naamh nyouz. Ziouv Yesu se Tin-Hungh. Ziouv Yesu yiem tin-dorngx wuov za'gengh njienh youh orn-lorqc haic nyei dorngx. Mv baac Ziouv Yesu siev jienv njang-laangc nyei dorngx, guangc jienv njienh youh orn-lorqc nyei dorngx njiec naaiv baamh gen daaih caux mbuo siouc kouv yiem naaiv orqv waaic nyei baamh gen. Ziouv Yesu hnamv haic mbuo, korh lienh haic mbuo, cingx daaih dorh hlo haic nyei en njiec naaiv orqv baamh gen nyei dorngx, dorh jienv Tin-Hungh nyei zien leiz daaih njaaux mbuo, bun mbuo haih bieqc hnyouv Tin-Hungh nyei zien leiz. Zeiz nyei, Tin-Hungh nyei zien leiz se dongh Ging-Sou nyei waac aqv. Yo^han yaac tengx Ziouv Yesu zoux zorn-g-zengx. Yo^han heuc jienv gorngv, "Yie gorngv jiex nyei wuov dauh se dongh naaiv dauh aqv. Yie daaih ndaangc, ninh nqa'haav daaih mv baac ninh zoux gauh hlo yie, weic zuqc yie maiv gaengh cuotv seix ninh zungv yiem nyei."

Yo^han porv mengh Ziouv Yesu dongh haaix dauh bun mbuo hiuv. Yo^han gorngv ninh cuotv seix ndaang, mv baac dongh Yo^han mv gaengh cuotv seix nyei ziangh hoc, Ziouv Yesu zungv yiem jienv nyei. Zeiz nyei, weic zuqc Ziouv Yesu m'daaih Tin-Hungh, dongh maiv gaengh maaiah lungh maaiah ndau nyei ziangh hoc, Ziouv Yesu m'daaih yiem jienv nyei. Naaiv se dongh Ziouv Yesu nyei hlo haic nyei en aqv, dongh mbuo maiv haih lorz maiv buatc nyei, dongh jiem nyaanh maaiz maiv ndutv nyei en, dongh mbuo baamh mienh maiv haih duqv nyei en, Ziouv Yesu dorh daaih baeqc baeqc bun mbuo. Haaix dauh sienx kaux Ziouv Yesu, yaac zipv Ziouv Yesu zoux Njoux Ziouv nor, wuov dauh ziouc duqv wuov nyungc hlo haic nyei en, se dongh yietc liuz nyei maengc aqv. Mbuo lungh ndiev mienh maiv maaiah haaix dauh buatc jiex Tin-Hungh, mv baac kungx Tin-Hungh nyei Dorn Ziouv Yesu duqv buatc jiex hnangv. Weic zuqc mbuo maiv maaiah haaix dauh buatc jiex Tin-Hungh, maiv maaiah haaix dauh hiuv duqv Tin-Hungh. Se gorngv maiv maaiah haaix dauh daaih mbuox mbuo nor, mbuo zungv maiv maaiah lamh hnamv dorngx aqv. Hnangv naaiv mbuo laengz zingh haic Tin-Hungh fungx Ziouv Yesu daaih naaiv baamh gen mbuox mbuo, bun mbuo haih hiuv duqv Tin-Hungh caux Tin-Hungh nyei Kuv Fienx nyei zien leiz.

Mbuo hnamv jienv dauh dauh njaaux mienh jiex wuom nyei leiz nyei fin-saeng fai jiu baang nyei mienh gox, njaaux yaac porv mengh bun oix jiex wuom nyei leiz wuov deix mienh muoz doic haih bieqc hnyouv Ziouv Yesu se dongh njoux maanc mienh nyei Ziouv. Zuov ninh mbuo bieqc hnyouv nor, ninh mbuo yaac buangv hnyouv buangv eix nyei jiex wuom nyei leiz aqv. Weic zuqc ninh mbuo hiuv duqv Ziouv Yesu hnamv yaac korh lienh mbuo, cingx njiec naaiv lungh ndiev siev Ninh nyei maengc weic njoux yietc zungv sienx Ninh nyei mienh. Ziouv Yesu mbenc ziangx hlo haic nyei en zuov jienv mbuo nyei. Naaiv hlo haic

neyi en yaac baeqc-baeqc bun mienh mbuo hngv. Zeiz neyi, Ziouv Yesu neyi en se hlo haic jaaix haic, mv baac Ziouv oix baeqc baeqc bun mbuo lungh ndiev mienh hngv. Mv baac haih duqv fai maiv haih duqv se yiem meih ganh dingc hnyouv aqv. Se gorngv meih dingc hnyouv sung meih neyi buoz, koi meih neyi hnyouv zipv Ziouv Yesu nor, meih ziouc duqv naaiv norm domh en zingh se dongh jiem nyaanh maaiz maiv ndutv neyi ziangh maengc ningv aqv. Maiv gunv Ziouv Yesu zorqv hlo haic neyi en cunv jienv meih, mv baac meih maiv zipv nor, meih ganh nqemh cuotv mi' aqv. Haaix dauh nqemh cuotv nor, dongh wuov dauh ziouc maiv duqv zipv, se gorngv maiv duqv zipv Ziouv Yesu neyi en nor, nq'haav ziouc hoic zuqc ninh ganh kouv haic, maiv maaiah dornx kaux aqv.

Dongh Ziouv Yesu ganh gorngv, “**YIE ZOUX**” wuov deix waac, ziouc tengx mbuo hiuv duqv Ziouv Yesu gauh longx. Ih zanc zorqv mbuo neyi Ging-Sou, Loz-Ngaengc waac daaih juangv jienv doqc muangx gaax oc. Naaiv yiem Cuotv I'yipv 3:14,

14 Tin-Hungh gorngv mbuox Mose, “Yie neyi mbuox heuc, Yietc Liuz Ziangh Jienv Wuov Dauh. Meih oix zuqc mbuox ninh mbuo, ‘Mbuox heuc Yietc Liuz Ziangh Jienv Wuov Dauh paaiv yie daaih lorz meih mbuo.’”

Naaiv yiemc Ging-Sou se Tin-Hungh ganh gorngv neyi waac. Tin-Hungh se dongh yietc liuz yiem yietc liuz ziangh jienv wuov dauh Ziouv. Weic zuqc Tin-Hungh se YIETC LIUZ ZIANGH JIENV neyi Tin-Hungh. Hngv naaiv Ziouv Yesu yaac fih hngv neyi yietc liuz ziangh jienv. Zeiz neyi, weic zuqc Ziouv Yesu se Tin-Hungh. Jiex mingh Ziouv Yesu aengx gorngv, “**YIE ZUNGV YIEM NYEI**” Hngv mbuo aengx koi mbuo neyi Ging-Sou Siang-Ngaengc Waac oc. Naaiv yiem Yo^han 8:58,

58 Yesu dau, “Yie gorngv zien mbuox meih mbuo, Apc^laa^ham maiv gaengh cuotv seix, yie zungv yiem neyi.”

Naaiv yaac njaaux jiex wuom neyi leiz wuov deix mienh muoz yaac njaaux mbuo dauh dauh sienx Tin-Hungh neyi mienh, bun mbuo hiuv duqv gorngv, “Dongh maiv gaengh zeix lungh zeix ndau wuov zanc Ziouv Yesu m'daaih ziangh jienv yiem jienv neyi. Hngv naaiv mbuo ziouc hiuv duqv nyungc-nyungc lungh ndiev mienh zangc neyi zienh se yiem Tin-Hungh neyi ga'ndiev. Weic zuqc nyungc-nyungc gorn-baengx se yiem Tin-Hungh cuotv daaih. Weic zuqc Tin-Hungh ganh zeix cuotv mienv, cingx daaih zeix cuotv maanc muotc. Mbuo yaac hiuv duqv maiv maaiah haaix nyungc zienh haih duqv yietc liuz yiem, maiv maaiah yietc nyungc mienv haih duqv yietc liuz ziangh, Saadaan yaac taux ziangh hoc zungv zuqc dingc zuiz aqv. Weic naaiv mbuo cingx daaih maaiah lamh hnamv dornx, yaac maaiah lamh kaux dornx weic zuqc mbuo yietc zungv sienx Ziouv Yesu neyi mienh taux ziangh hoc mbuo ziouc duqv caux Ziouv Yesu yietc liuz yiem.

Jiex mingh Ziouv Yesu aengx gorngv, “Yie zoux baamh mienh neyi Dorn.”

Zoux haaix nyungc Ziouv Yesu heuc Ninh ganh zoux baamh mienh neyi Dorn?

Weic zuqc Ziouv Yesu za'gengh benx baamh mienh. Ziouv Yesu yiem tin-dorngh njiec naaiv baamh gen cuotv seix daaih benx baamh mienh, m'daaih hngv meih caux yie nor. Weic zuqc Yo^han 1:14, caux Hipv^lu 2:17 wuov hngv naaiv gorngv'

14 Doz benx dauh baamh mienh yiem mbuo mbu'ndongx. Ninh maaiah en hlo haic, yaac bun mbuo hiuv duqv nzengc Tin-Hungh neyi zien leiz. Yie mbuo duqv buatc ninh neyi njang-laangc, se weic zuqc ninh zoux Tin-Hungh neyi ndoqc Dorn zipv daaih neyi njang-laangc. (Yo^han 1:14) 17 Weic naaiv ninh oix zuqc yiem nyungc-nyungc sic zuangv nzengc ninh neyi gorx-youz, weic zoux ninh mbuo hlo jiex neyi domh sai mienh. Ninh maaiah hnyouv korh lienh mienh yaac ziepc zuoqv neyi fuh sux Tin-Hungh, weic bun mienh duqv guangc zuiz. (Hipv^lu 2:17)

Mbuo oix zuqc faix fim neyi haaix zanc yaac jangx jienv longc mbuo neyi Ging-Sou zoux mbuo sienx fim neyi gorn-ndoqv. Laaix maaiah deix sienx jaav, njaaux jaav neyi mienh gorngv Ziouv Yesu se maiv benx baamh mienh. Ziouv Yesu benx Tin-Hungh hngv. Se gorngv haaix dauh hngv naaic nor njaaux nor, meih mbuo maiv dungx muangx ninh nduov oc. Weic zuqc Ging-Sou gorngv jienv mengh mengh neyi, “**DOZ**” benx baamh yiem mbuo mbu'ndongx. Se gorngv mbuo oix caux mienh nzaeng, se gorngv mbuo oix caux mienh bungx wuonh zaang nor, mbuo yaac haih caux mienh nzaeng duqv, haih caux mienh gorngv duqv neyi. Mv baac mbuo maiv haih caux Tin-Hungh nzaeng, mbuo maiv haih caux Ging-Sou doix-dek. Weic naaiv mbuo cingx daaih haih bungx laangc neyi bangc yaac sienx Tin-Hungh neyi waac se dongh mbuo neyi Ging-Sou, ziouc longc Ging-Sou zoux mbuo sienx fim neyi gorn-ndoqv nor mbuo zungv maiv dornx aqv. Mbuo corc aengx maaiah Hipv^li 2:17 wuov caux jienv porv mengh mbuox mbuo gorngv, “Ziouv Yesu oix zuqc yiem nyungc-nyungc sic zuangv nzengc ninh neyi gorx-youz, (Yesu neyi gorx-youz se dauh dauh sienx Yesu neyi mienh aqv) weic zoux ninh mbuo hlo jiex neyi domh sai mienh.”

Se gorngv Ziouv Yesu maiv benx baamh mienh nor, Ziouv Yesu zungv maiv haih zungv Ninh neyi gorx-youz. Hngv naaiv mbuo hiuv duqv Ziouv Yesu se benx nzengc Tin-Hungh yaac benx nzengc mbuo baamh mienh, Ziouv Yesu cingx daaih haih benx mbuo dunh yunh neyi Njoux Ziouv. Maaiah yietc nyungc

Ziouv Yesu caux mbuo maiv fih hngangv se, mbuo baamh mienh maaih zuiz, ***mv baac Ziouv Yesu se maiv maaih zuiz***, Ziouv Yesu se cing-nzengc nyei, Ziouv Yesu se dunh yunh nyei. Yiem Yo[^]han 6:48, wuov hngangv naaiv gorngv, ***48 Yie zoux yungz maengc nyei Nyanc hopv***.

Mbuo nyei sin zaangc yaac qiex zuqc nyanc hopv nyungz mbuo nyei sin mbuo cingx daaih haih hlo, cingx daaih haih henv. Mbuo nyei lingh wuonh se Ziouv Yesu ganh haih yungz hngangv. Weic naaiv dongh bun mbuo nyei lingh wuonh haih hlo daaih duqv yietc liuz nyei maengc se Ziouv Yesu nduqc dauh haih bun mbuo hngangv. Jiex mingh yiem yiem Yo[^]han 9:5, wuov hngangv naaiv gorngv, ***5 Yie corc yiem jienv baamh gen nyei ziangh hoc yie zoux Njang ziux baamh gen.***

Ziouv Yesu zoux lingh wuonh nyei njang ziux lungh ndiev maanc mienh nyei lingh wuonh.

M'daaih hngangv mba'hnoi nor ziux njang se bun mbuo lungh ndiev mienh haih mangc duqv buatc yangh jauv maiv caaiv pien ndortv ndau-kuotv, yaac haih mangc duqv buatc zoux gong, lorz nyanc hopv weic nyungz mbuo nyei sin, yaac haih mangc duqv buatc doqc Ging-Sou nyungz mbuo nyei lingh wuonh. Ziouv Yesu zoux njang ziux mbuo nyei lingh wuonh, bun mbuo nyei lingh wuonh haih mangc duqv buatc, lorz duqv buatc jauv nzuonx daaih sienx Tin-Hungh. Ziouv Yesu yaac zoux njang ziux mbuo nyei lingh wuonh bun mbuo haih mangc duqv buatc zoux Tin-Hungh nyei gong fuh sux Tin-Hungh. Se gorngv mbuo nyei lingh wuonh maiv maaih Ziouv Yesu nyei njang ziux nor, mbuo nyei lingh wuonh ziouc hngangv miev lamx jienv nyutc pui maiv taux nyei ga'naaiv zuangx nor, ngoi ngoi yangh wuov maiv haih hlo. Aengx yiem Yo[^]han 10:7 wuov hngangv naaiv gorngv, ***7 Yesu ziouc aengx gorngv mbuox ninh mbuo, "Yie gorngv zien mbuox meih mbuo, yie se naaiv deix ba'gi yungh nyei Laac gaengh.***

Ziouv Yesu ganh zoux ba'gi yungh nyei ***Laac gaengh***. Se gorngv ba'gi yungh yangh laac gaengh bieqc mingh nor, ba'gi yungh ziouv ziouc goux jienv lungh muonz maiv zuqc hieh saeng-kuv ngaatc, cingx duqv maengc cuotv. Ba'gi yungh se beiv taux mbuo yietc zungv sienx Ziouv Yesu nyei mienh aqv. Hngangv naaiv haaix dauh yangh Ziouv Yesu nyei laac gaengh bieqc mingh ziouc maiv zuqc dingc zuiz, mv baac oix duqv yietc liuz nyei maengc. Weic zuqc maiv maaih ganh dauh laac gaengh, yaac maiv maaih ganh dauh ziouv hngangv Ziouv Yesu nor bun mbuo bieqc Ninh nyei gaengh yaac njoux mbuo aqv.

Yiem Yo[^]han 10:11 wuov Ziouv Yesu yaac gorngv, ***11 "Yie se Goux ba'gi yungh longx nyei ziouv. Goux ba'gi yungh longx wuov dauh nyunc weic ba'gi yungh siev ninh nyei maengc."*** Mbuo hiuv duqv goux ba'gi yungh nyei mienh fai goux ba'gi yungh nyei kuv ziouv nor, ninh goux longx ninh nyei ba'gi yungh maiv bun janx-zaqc nim, yaac maiv bun hieh saeng-kuv ngaatc, mv baac yungz longx goux longx bun ba'gi yungh haih hlo haih hiaangx hngangv. Ziouv Yesu se dongh naaiv dauh Njoux Ziouv aqv. Ziouv Yesu maiv daan goux longx ba'gi yungh hngangv, mv baac Ziouv Yesu zungv siev maengc weic ninh njoux Ninh nyei ba'gi yungh. Ba'gi yungh se beiv taux sienx Ziouv Yesu nyei mienh aqv. Ziouv Yesu za'gengh longx haic nyei Njoux Ziouv. Weic zuqc Ziouv Yesu hnamv mbuo korh lienh mbuo yaac siev Ninh nyei maengc weic njoux mbuo. Jiex mingh taux Yo[^]han 11:25, wuov gorngv, ***25 Yesu gorngv mbuox ninh, "Yie se dongh bun mienh nangh daaih maaih maengc ziangh wuov dauh. Haaix dauh sienx yie, maiv gunv ninh daic mingh, ninh aengx Oix nangh daaih."*** Mbuo hiuv duqv naaiv lungh ndiev mienh, maiv maaih haaix dauh zienh daic mingh aengx haih nangh daaih.

Mbuo hiuv duqv maiv maaih haaix dauh mienh daic mingh aengx haih nangh daaih. Mv baac se gorngv haaix dauh sienx Ziouv Yesu zoux ninh nyei Njoux Ziouv nor, Ziouv Yesu ziouc bun ninh aengx nangh daaih. Weic zuqc Ziouv Yesu ganh zuqc ding ziepc nzaangc jaax daic mingh, mv baac buo hnoi Ziouv Yesu aengx nangh daaih aqv. Weic zuqc Ziouv Yesu daic mingh Tin-Hungh nyei domh qaqv bun Ninh aengx nangh daaih. Weic naaiv haaix dauh sienx Ziouv Yesu zoux ninh nyei Njoux Ziouv, Ziouv Yesu ziouc bun wuov dauh yaac haih nangh daaih fih hngangv nyei. Yiem Yo[^]han 14:6 wuov yaac hngangv naaiv nor gorngv,

6 Yesu dau, "Yie se dongh mingh Tin-Hungh wuov diuh Jauv, yaac dongh Zien leiz, yaac dongh Ziangh maengc wuov dauh. Cuotv liuz kaux yie, maiv maaih haaix dauh haih mingh duqv taux Zangc Diex wuov."

Ziouv Yesu ganh dongh mingh tin-dorngh wuov diuh jauv. Cuotv liuz Ziouv Yesu maiv maaih ganh diuh jauv haih tengx mbuo duqv njoux aqv. Weic zuqc Ging-Sou gorngv, ***"Cuotv liuz sienx Ziouv Yesu, cuotv liuz bangc yaac kaux Ziouv Yesu maiv maaih haaix dauh haih mingh duqv taux tin-dorngh aqv.***

Yiem Gong-zoh 4:12, wuov yaac gorngv, ***12 "Cuotv liuz Yesu, maiv maaih haaix dauh haih bun mienh duqv njoux, weic zuqc yiem lungh ndiev maanc mienh, Tin-Hungh maiv ceix ganh norm mbuox weic bun mbuo duqv njoux."*** Ziouv yaac maiv daan mingh tin-dorngh wuov diuh jauv hngangv, mv baac Ziouv Yesu yaac dongh ZIEN LEIZ yaac dongh ZIANGH MAENGC.

Ging-Sou mbuox mbuo, cuotv liuz Ziouv Yesu maiv maaih ganh dauh zien nyei Njoux Ziouv aqv. Ziouv Yesu ganh dongh zien wuov dauh Njoux Ziouv, Ziouv Yesu cingx daaih haih bun dauh dauh sienx Ninh nyei mienh haih duqv yietc liuz nyei maengc. Laaix yiem lungh yiem ndau maiv maaih ganh dauh zien nyei njoux ziouv, cingx daaih dongh maanc mienh zangc nyei zienh maiv maaih yietc dauh haih laengz bun mienh duqv ziangh maengc. Ziouv

Yesu haih laengz duqv bun dauh dauh sienx Ninh nyei mienh duqv yietc liuz nyei maengc, se weic zuqc Ziouv Yesu dongh zien wuov dauh Njoux Ziouv.

Aengx jhex mingh yiem Yo^han 15:5 wuov Ziouv Yesu hnavg naaiv gorngv, 5 *“Yie se A’ngunc hmei. Meih mbuo se a’ngunc nquaah. Haaix dauh ziangh jienv yie, yie yaac ziangh jienv ninh, wuov dauh ziouc ziangh biouv gitv aqv. Meih mbuo leih nqoi yie nor, meih mbuo maiv haih zoux haaix nyungc.”*

Ziouv Yesu gorngv, Ninh zoux A’ngunc hmei maac, mbuo sienx Ninh nyei mienh se hmei-nquaah. Mbuo dauh dauh hiuv duqv gorngv, “Diuh diuh hmei-nquaah zungv oix zuqc bangc hmei-maac cingx daaih haih ziangh jienv hnavg.” Mbuo buatec kuaaiv ndiangx normh ndutv mingh nor, ziouc nyaux yaac nqaai mi’aqv. Se gorngv haaix dorv hmei-nquaah fai ndiangx-nquaah ndutv mingh nor ziouc nyaux yaac nqaai mi’aqv. Normh caux hmei-nquaah ndutv yaac nqaai mv baac hoic maiv zuqc hmei-maac. Mv baac se gorngv hmei-maac ndutv nor, normh caux jienv yietc zungv hmei-nqaah ziouc nyaux nqaai nzengc aqv. Hnavg naaiv bun mbuo hiuv duqv, hmei-maac se maiv bangc hmei-nquaah yaac duqv nyei, mv baac hmei-nquaah nor, ndongc haaix zungv oix zuqc bangc hmei-maac nyei. Weic naaiv Ziouv Yesu cingx daaih dorh mbuo baamh mienh daaih beiv taux hmei-nquaah, aengx dorh Ziouv Yesu ganh beiv taux hmei-maac weic njaaux mbuo.

Weic zuqc mbuo lungh ndiev mienh dauh dauh oix zuqc bangc Ziouv Yesu ziangh jienv cingx daaih haih duqv yietc liuz nyei maengc, mv baac Ziouv Yesu maiv qiemx zuqc bangc mbuo. Se gorngv mbuo oix caux Ziouv Yesu ziangh jienv nor, mbuo yaac oix zuqc sienx Ziouv Yesu cingx daaih haih duqv caux Ziouv Yesu ziangh jienv. Mbuo jangx duqv nyei orqc, dongh Tin-Hungh zeix maanc muotc yaac zeix Aandam daaih Tin-Hungh ziouc biomv ziangh maengc nyei qiex bieqc Aandam nyei mba’zong, Aandam cingx daaih maaiah maengc ziangh jienv. Hnavg naaiv mbuo cingx hiuv duqv gorngv mbuo baamh mienh nyei maengc se yiem Tin-Hungh daaih, mbuo baamh mienh nyei maengc se borqv jienv Tin-Hungh nyei.

Weic naaiv cingx daaih haaix dauh maiv caux Tin-Hungh ziangh jienv se hnavg a’ngunc hmei-nquaah maiv ziangh hmei-maac nor ziouc nyaux nqaai daic nzengc mi’aqv. Hnavg naaiv Ziouv Yesu cingx daaih gorngv mbuox mbuo, “Dauh dauh sienx Ninh nyei mienh, se gorngv haaix dauh maiv ziangh jienv hmei-maac ziouc zoux maiv cuotv haaix nyungc aqv, zungv nyaux nqaai yaac daic aqv.”

Weic zuqc mbuo lungh ndiev mienh se yiem Ziouv Yesu cuotv daaih. Se gorngv mbuo maiv sienx Yesu yaac maiv bangc Tin-Hungh nor, mbuo nyei lingh wuonh ziouc hnavg hmei-nquaah nor nqaai ziouc daic aqv. Mbuo oix zuqc sienx Ziouv Yesu yaac bangc Tin-Hungh mbuo nyei lingh wuonh cingx daaih duqv caux Ziouv Yesu ziangh jienv. Meih mbuo dauh dauh oix jhex wuom nyei leiz nyei mienh muoz aac, Ging-Sou nyei Waac za’gengh jienv haic. Hnavg naaiv mbuo dauh dauh sienx liuz Tin-Hungh nyei mienh, za’gengh oix zuqc sienx yaac muangx nzengc Ging-Sou nyei waac mbuo cingx daaih haih duqv Tin-Hungh nyei en.

VIII. SINGX LINGH

Singx Lingh se haaix dauh?

Singx Lingh se Tin-Hungh. Singx Lingh se dongh tengx mbuo yaac orn mbuo nyei hnyouv, yaac tengx mbuo hiuv duqv Tin-Hungh nyei zien leiz wuov dauh Ziouv.

Weic zuqc Yo^han 14:16-17, wuov hnavg naaiv gorngv, *“16 Yie oix tengx Zangc Diex tov, ninh ziouc oix bun ganh dauh daaih tengx meih mbuo, **caux meih mbuo yietc liuz yiem.** 17 Naaiv dauh se Singx Lingh, dongh bun mienh **hiuv duqv zien leiz** wuov dauh. Baamh mienh maiv haih zipv ninh, weic zuqc baamh mienh mange maiv buatec ninh yaac maiv hiuv duqv ninh. Mv baac meih mbuo hiuv duqv ninh nyei, weic zuqc ninh caux meih mbuo yiem yaac yiem meih mbuo nyei hnyouv.*

Singx Lingh yietc liuz caux mbuo yiem. Naaiv yaac doix Ziouv Yesu a’lamh nzuonx tin-dorng h wuov zanc Ziouv Yesu laengz bun mbuo dauh dauh sienx Ninh nyei mienh wuov deix waac. Dongh Ziouv Yesu gorngv, “Yie caux meih mbuo yiem taux baamh gen nyei nyutc zeiv jhex.” Singx Lingh yaac fih hnavg nyei yietc liuz caux mbuo yiem tengx maaiah qaqv sienx longx Yesu, yaac dorh jienv mbuo ganh longx Tin-Hungh muangx Tin-Hungh nyei waac. Singx Lingh se dongh zoux gong yiem mbuo nyei hnyouv tengx mbuo haih hiuv duqv Tin-Hungh nyei zien leiz, se dongh Ging-Sou njaaux nyei waac aqv. Singx Lingh yaac tengx mbuo haih bieqc hnyouv gorngv pou tong mienh maiv oix zipv Ziouv Yesu maiv oix zipv Singx Lingh se laaix ninh mbuo maiv hiuv yaac mange maiv buatec Singx Lingh. Mv baac sienx Yesu nyei mienh Singx Lingh oix njaaux nyungc-nyungc Tin-Hungh nyei jauv. Weic zuqc yiem Yo^han 14:26 wuov hnavg naaiv gorngv, *“26 Tengx Mienh Wuov Dauh, dongh Zangc Diex oix dengv yie nyei mbuox paaiv daaih wuov dauh Singx Lingh, oix njaaux nyungc-nyungc meih mbuo yaac oix bun meih mbuo haih **jangx duqv** yie mbuox jhex nyei yietc zungv.*

Dongh mbuo haih jangx duqv Tin-Hungh nyei waac, haih jangx duqv Tin-Hungh nyei zien leiz se Ziouv Singx Lings aqv tengx mbuo haih jangx duqv. Singx Lings tengx mbuo haih jangx jienv Tin-Hungh nyei en, Singx Lings tengx mbuo haih jangx jienv Ziouv Yesu hnamv mbuo, korh lienh mbuo yaac daic weic njoux mbuo. Dongh mbuo buangh kouv buangh nzauh nyei ziangh hoc, Singx Lings yaac tengx mbuo haih maaih lamh hnamv, yaac tengx mbuo haih bangc Tin-Hungh. Yo^han 16:8 wuov yaac hnavg naaiv gorngv mbuox mbuo, 8 *“Tengx Mienh Wuov Dauh daaih wuov zanc, ninh oix biux mengh baamh mienh hnamv dornge taux zuiz nyei jauv, taux zoux horpc nyei jauv, aengx taux Tin-Hungh oix hnavg haaix nor siemv zuiz nyei jauv.* Mbuo dauh dauh lungn ndiev mienh zungv maaih zuiz nyei. Mv baac Saadaan maiv oix mbuo hiuv duqv mbuo ganh maaih zuiz.

Mv baac Tin-Hungh nyei lingc gauh hlo, Singx Lings nyei qaqv gauh camv. Hnavg naaiv Singx Lings ziouc tengx mbuo baamh mienh haih hiuv duqv mbuo ganh maaih zuiz, zoux waac maiv horpc Tin-Hungh. Singx Lings cingx daaih bun mbuo hiuv duqv, se gorngv mbuo maiv goiv hnyouv sienx Yesu nor, taux ziangh hoc mbuo ziouc zuqc dingc zuiz aqv. Hnavg naaiv haaix dauh hiuv duqv ganh maaih zuiz, haaix dauh goiv hnyouv sienx Ziouv Yesu mbuo ziouc hiuv duqv naaiv se Singx Lings zoux nyei gong hnavg. Singx Lings se dongh tengx mbuo haaix zanc yaac jangx jienv oix zoux horpc Tin-Hungh nyei hnyouv wuov dauh Ziouv. Singx Lings yaac zanc zanc kuinx mbuo zoux cing-nzengc nyei, fioux mbuo nyei maengc cing nzengc nyei weic Tin-Hungh, naaiv se Singx Lings zoux nyei gong, naaiv se Tin-Hungh nyei eix aqv.

Mbuo duqv hoqc taux Ziouv Yesu zoux siec nyungc jienv haic nyei ga'naaiv weic yungz yaac njoux mbuo nyei lingh wuonh. Wuov deix siec nyungc dongh haaix nyungc?

1. Ziouv Yesu dongh, **“Ziangh maengc nyei nyanc hopv.”**
2. Ziouv Yesu dongh, **“Baamh gen nyei njang.”**
3. Ziouv Yesu dongh, **“Duqv njoux nyei laatc gaengh.”**
4. Ziouv Yesu dongh, **“Longx nyei goux ba'gi yungh ziouv.”**
5. Ziouv Yesu dongh, **“Bun mienh aengx nangh daaih nyei Ziouv.”**
6. Ziouv Yesu dongh, **“Jauv, dongh zien leiz yaac dongh ziangh maengc.”**
7. Ziouv Yesu dongh, **“A'ngunc hmei.”**

Wuov nyungc Singx Lings niv dongh haaix nyungc?

Singx Lings se kuinx mbuo, tengx mbuo hiuv duqv mbuo ganh se maaih zuiz nyei mienh, tengx mbuo maaih hnyouv oix zoux horpc Tin-Hungh, yaac tengx mbuo oix fioux maengc cing-nzengc nyei weic Tin-Hungh yaac fungx maengc ziec bun Tin-Hungh. Mienh muoz doic aac, dongh jicx daaih wuov deix bieie zaang mbuo duqv hoqc taux **Singx Diex, Singx Dorn** caux **Singx Lings**.

Hnavg naaiv mbuo aengx nzutv zunv hoqc deix taux Tin-Hungh se dongh maaih lingc zoux duqv nyungc-nyungc wuov dauh Ziouv. Mbuo dauh dauh sienx Tin-Hungh nyei mienh horpc zuqc gamh nziex Tin-Hungh, taaih Tin-Hungh yaac muangx Tin-Hungh nyei waac. Weic zuqc Tin-Hungh maaih qaqv maaih lingc zeix maanc muotc yaac zeix mbuo cuotv daaih. (Tin-Deic Douh 2:4-19, I^saa^yaa 44:24, Ye^li^mi 1:5)

Mbuo sienx Tin-Hungh nyei mienh gamh nziex Tin-Hungh, se mv zeiz hnavg gamh nziex janx-zaqc ziouc biaux nor. Mv baac mbuo gamh nziex Tin-Hungh se dongh gamh nziex daaih oix muangx Tin-Hungh nyei waac yaac ei jienv Ging-Sou njaaux nyei waac zoux, yaac zoux Tin-Hungh nyei gong. (E^fe^so 2:10)

Mbuo sienx Tin-Hungh nyei mienh gamh nziex Tin-Hungh, ziouc oix taaih Tin-Hungh buoqc zangc Tin-Hungh yaac muangx Tin-Hungh nyei waac. (Singx Nzung 139:14, 86:9, 95:6)

Mbuo dauh dauh sienx Tin-Hungh nyei mienh oix zuqc gamh nziex Tin-Hungh weic zuqc Tin-Hungh cing-nzengc haic. Se gorngv mbuo gamh nziex Tin-Hungh weic zuqc Tin-Hungh cing-nzengc nor, mbuo yaac oix zoux cing-nzengc nyei weic Tin-Hungh. (Lewi 11:44, 1 Bide 1: 16)

Tin-Hungh se cing nzengc haic, se gorngv mbuo maaih zuiz fai mbuo nyei maengc maiv caux Tin-Hungh horpc nor, Tin-Hungh oix hnavg douz nor zieqc nzengc mbuo. (I^saa^yaa 33:14)

Tin-Hungh za'gengh cing-nzengc haic, ziouc hnavg douz nor, oix buov nzengc nyungc-nyungc laih hlopv nyei sic yaac mietc nzengc nyungc-nyungc zuiz, hnavg Tin-Hungh nyei douz mietc So^ndom zingh wuov nor. Yiem Tin-Deic Douh 19:1-29, Tin-Deic Douh 19:1-29. wuov gornvg taux Tin-Hungh mietc So^ndom nyei jauv.

Zeiz nyei, yaac hnavg Tin-Hungh mietc Ko^laa caux ninh nyei mienh, se laaix ninh mbuo zoux zuiz doix-dekc Tin-Hungh, ziouc zuqc Tin-Hungh nyei douz mietc nzengc ninh mbuo. Naaiv deix jauv-louc se yiem Saav Mienh 16:35, *“35 Aengx maaih douz yiem Ziouv cuotv daaih buov qui nzengc dorh hung mingh fongc horc wuov deix nyic baeqv hmz ziepc dauh mienh.”*

Ging-Sou gornvg nyei waac bun cingx mbuo hiuv duqv Tin-Hungh maaih lingc zoux nyungc-nyungc sic. Weic naaiv mbuo cingx daaih oix zuqc gamh nziex Tin-Hungh taaih Tin-Hungh muangx Tin-Hungh nyei waac mbuo cingx daaih maiv zuqc dingc zuiz hnavg. Ging-Sou gornvg, Tin-Hungh zoux maanc ziouv nyei Ziouv, maanc hungh nyei Hungh. (Nzanc Leiz-latc 10:17, Laauc Yaangh 17:14)

Hnavg naaiv maiv gunv ih zanc haaix norm guoqv maaih lingc ndongc haaix camv, maaih hungh lingc ndongc haaix hlo mv baac maaih norm ziangh hoc zungv zuqc siemv zuiz yiem Tin-Hungh nyei nza^hmien aqv. Zeiz nyei, maiv maaih haaix dauh haih biaux duqv ndutv maiv zuqc Tin-Hungh dingc zuiz. Mienh muoz doic aac, hnavg naaiv mbuo jangx jienv oc, Tin-Hungh ganh nduqc dauh hnavg maaih lingc njoux mienh nyei maengc, yaac maaih lingc dingc mienh nyei zuiz. Weic zuqc yiem Matv^taai 10:28, wuov hnavg naaiv gornvg, *“28 Maiv dungx gamh nziex mienh. Ninh mbuo haih daix sin mv baac maiv haih daix lindh wuonh. Daaux nzuonx oix zuqc gamh nziex Tin-Hungh. Tin-Hungh haih bun liemh sin liemh lindh wuonh ndortv Deic nyuoqc zuqc mietc.”*

Hnavg naaiv mbuo ziouc hiuv duqv se gornvg, lungn ndiev mienh se haih hoic mbuo nyei sin hnavg, mv baac maiv haih hoic mbuo nyei lungn wuonh. Weic naaiv mbuo yiem maanc sic oix zuqc muangx Tin-Hungh ndaangc, jiex mingh mbuo cingx daaih ei jienv Ging-Sou njaaux nyei waac muangx mienh. Tin-Hungh se maaih lingc ceix en mbuo, Tin-Hungh yaac dongh maaih lingc bun mbuo zuqc zioux wuov dauh Ziouv.

Naaiv douc Ging-Sou ndaav nyei weic naaiv mbuo maiv doqc cuotv dienx taaih aqv. Mv baac dongh meih mbuo haaix dauh njaaux jiex wuom nyei leiz wuov deix mienh muoz nor, gunv dorh jienv ninh mbuo doqc yaac porv mengh bun ninh mbuo bieqc hnyouv oc. Naaiv douc Ging-Sou njaaux mbuo haaix dauh muangx Tin-Hungh nyei waac yaac ei jienv zoux ziouc duqv Tin-Hungh ceix fuqv bun.

Naaiv yiem Lewi 26:1-13.

Mv baac haaix dauh maiv muangx Tin-Hungh nyei waac nor ziouc zuqc Tin-Hungh nyei waac zioux aqv. Naaiv yiem Lewi 26:14-39.

Hnavg naaiv mbuo jangx jienv naaiv douc Ging-Sou yaac dorh daaih buih yiem mbuo nyei hnyouv tengx mbuo haih zoux horpc Tin-Hungh, ziouc duqv Tin-hungh ceix fuqv bun yaac duqv yietc liuz nyei maengc. Mbuo hoqc taux jiex wuom nyei leiz nyei jauv se dongh naaiv aqv. Mbuo duqv hoqc liuz hiuv liuz **Ziouv Tin-Hungh** dongh haaix dauh, **Ziouv Yesu** dongh haaix dauh, **Ziouv Singx Lindh** dongh haaix dauh se longx haic. Weic bun mbuo haih buangv hnyouv buangv eix nyei jiex wuom nyei leiz, nqa^haav mbuo yaac haih buangv hnyouv buangv eix nyei sienx wuonv Tin-Hungh, yaac haih buangv hnyouv nyei diev zix nyungc kouv weic oix zoux horpc Tin-Hungh.

Jiex wuom nyei leiz maaih haaix nyungc eix leiz ?

Ging-Sou gornvg, mbuo jiex wuom nyei leiz caux Ziouv Yesu juangc daic, aengx nangh daaih caux Ziouv Yesu juangc maengc ziangh. Ih zanc doqc naaiv deix Ging-Sou muangx gaax Ging-Sou hnavg haaix nor njaaux mbuo oc. Naaiv yiem Lomaa 6:3-14

3 Meih mbuo hiuv duqv mbuo jiex wuom nyei leiz, mbuo duqv caux Yesu juangc maengc. Jiex leiz wuov zanc duqv caux ninh juangc daic. 4 Hnavg naaic, jiex wuom nyei leiz mbuo caux Giduc daic mingh biopv jienv weic bun mbuo duqv siang-ziangh maengc, hnavg Giduc daic mingh Tin-Hungh yaac longc njang-laangc nyei domh qaqv bun Giduc aengx nangh daaih ziangh jienv wuov nor. 5 Se gornvg mbuo duqv caux Giduc juangc maengc daic, Tin-Hungh bun mbuo nangh daaih hnavg ninh bun Giduc nangh daaih, mbuo yaac duqv caux Giduc juangc maengc ziangh. 6 Mbuo yaac hiuv duqv mbuo nyei loz-hnyouv zuqc caux Giduc ding wuov ziepc nzaangc jaax weic bun baamz zuiz nyei hnyouv zuqc mietc, cingx daaih maiv zuqc aengx zoux zuiz nyei nouh. 7 Weic zuqc haaix dauh daic mingh ziouc leih ndutv zuiz nyei qaqv mi'aqv. 8 Se gornvg mbuo caux Giduc daic mi'aqv, mbuo yaac sienx mbuo oix duqv caux ninh juangc maengc ziangh. 9 Mbuo hiuv duqv Giduc daic mingh Tin-Hungh aengx bun ninh nangh daaih. Nqa^haav ninh yietc liuz maiv daic aqv. Zuqc daic nyei qaqv maiv haih gunv ninh. 10 Giduc daic weic bun zuiz maiv haih gunv ninh. Daic nzunc, dornx duqv

yietc liuz. Ih zanc ninh ziangh jienv se weic Tin-Hungh ziangh. 11 Meih mbuo fih hhangv nyei, oix zuqc funx ganh hhangv daic mi'aqv nor, zuiz gunv maiv jienv. Mv baac meih mbuo caux Giduc Yesu juangc maengc ziangh ziouc weic Tin-Hungh ziangh jienv. 12 Weic naaiv maiv dungx bun zuiz gunv meih mbuo haih daic nyei sin, nduov meih mbuo ei ganh nyei hnyouv hanc oix zoux. 13 Maiv dungx bun sin zangc nyei haaix nyungc zoux zuiz, longc zoux waaic haic nyei sic. Daaux nzuonx oix zuqc fungx ganh bun Tin-Hungh, hhangv daic mingh mv baac Tin-Hungh bun aengx nangh daaih nyei mienh nor. Yaac zorqv sin nyei nyungc-nyungc bun ninh longc zoux horpc nyei sic. 14 Zuiz maiv duqv zoux ziouv aengx gunv meih mbuo, weic zuqc meih mbuo maiv yiem leiz-latic ga'ndiev. Meih mbuo yiem Tin-Hungh nyei en ga'ndiev.

Mbuo jiex wuom nyei leiz se maaih eix leiz, se beiv taux mbuo duqv caux Ziouv Yesu juangc maengc ziangh, yaac laaix zuiz caux Ziouv Yesu juangc daic. Dongh mbuo jiex wuom nyei leiz yiem wuom-ndiev nyei ziangh hoc, “Se beiv taux mbuo caux Ziouv Yesu daic biopv jienv yiem zouv ga'nyuoz.” Dongh mbuo yiem wuom cuotv daaih nyei ziangh hoc se maaih eix leiz gorngv, “Mbuo yaac duqv caux jienv Ziouv Yesu aengx nangh daaih aqv.” Ziouv Yesu zuqc daic yiem ziepc nzaangc jaax, se laaix mbuo maanc fingx mienh nyei zuiz. Zeiz nyei, weic zuqc Ziouv Yesu hnamv yaac korh lienh haic mbuo, ziouc tengx mbuo ndaam mbuo nyei maengc div mbuo nyei zuiz cingx zuqc daic yiem ziepc nzaangc jaax weic zuoqc mbuo yiem zuiz nyei buoz-ndiev cuotv daaih.

Weic naaiv mbuo ziouc hiuv duqv gorngv, “Mbuo maaih zuiz nyei loz-maengc, mbuo laih hlopv nyei loz-sin, mbuo orqv nyei loz-hnyouv zungv caux jienv Ziouv Yesu daic yiem mbuo jiex leiz nyei ziangh hoc miaqv. Ziouv Yesu laaix zuiz daic biopv jienv buo hnoi aengx nangh daaih. Yaac fih hhangv nyei, mbuo duqv sienx liuz Ziouv Yesu ziouc duqv caux Ziouv Yesu juangc maengc ziangh. Hhangv naaiv dongh mbuo jiex wuom nyei leiz caux Ziouv Yesu juangc maengc daic, dongh yiem wuom cuotv daaih wuov zanc se beiv taux mbuo duqv caux jienv Ziouv Yesu aengx nangh daaih aqv. Hhangv naaiv mbuo jiex wuom nyei leiz, bieqc wuom-ndiev beiv taux caux Yesu juangc maengc daic, aengx yiem wuom cuotv daaih se beiv taux caux Ziouv Yesu nangh daaih nyei siang-maengc, dongh cing-nzengc nyei Tin-Hungh a'hneiv nyei siang-maengc aqv.

Dongh mbuo jiex liuz wuom nyei leiz duqv yiem Ziouv Yesu bun mbuo nyei maengc, mbuo oix zuqc goux longx, yaac fioux nzengc nyei weic Tin-Hungh.

Fioux nzengc se maiv zeiz mbuo nyei lui-houx, mv baac oix zuqc fioux nzengc mbuo nyei maengc.

Oix zuqc fioux nzengc mbuo nyei hnyouv, yaac oix zuqc fioux nzengc mbuo zoux nyei sic.

Hhangv naaiv mbuo zaah deix mbuo nyei loz maengc nyei jauv mangc gaax hhangv haaix nor oc. Mbuo dauh dauh mienh maiv gunv m'jangc fai m'sieqv. Mbuo nyei loz-maengc se hhangv naaiv:

- Mbuo maaih gorngv-baeqc nyei hnyouv.
 - Mbuo maaih douh ganh duqv longx nyei hnyouv.
 - Mbuo maaih pienx mienh nyei hnyouv.
 - Mbuo maaih mauv ga'naaiv nyei hnyouv.
 - Mbuo nyei hnyouv hlo, haaix nyungc yaac oix longc gauh camv, oix duqv gauh camv ganh dauh.
 - Mbuo maaih ceng-hlo, maaih zoux maux nyei hnyouv.
 - Mbuo maaih oix zoux hlo nyei hnyouv.
 - Mbuo nyei hnyouv maiv cing nzengc, maaih hanc mienh nyei hnyouv.
 - Mbuo maaih oix nziaauc sieqv oix oix nziaauc dorn nyei hnyouv.
 - Mbuo maaih oix hienx auv oix hienx nqox nyei hnyouv.
 - Mbuo maaih oix jaauv win nyei hnyouv.
 - Maaih nzornng mienh nyei hnyouv.
 - Mbuo maaih youx Tin-Hungh, maiv muangx Tin-Hungh nyei waac, yaac maaih doix-dekc Tin-Hungh nyei hnyouv.
-
- Mbuo horpc zuqc gamh nziex Tin-Hungh taaih Tin-Hungh, mv daaux nzuonx mbuo gamh nziex, mienv dongh Tin-Hungh hingh jiex, Tin-Hungh gauh henv wuov dauh Saadaan.
 - Mbuo gamh nziex **guaix**.
 - Mbuo gamh nziex **baamz**.
 - Mbuo maaih gamh nziex **lung hndau**.
 - Mbuo maaih gamh nziex **mbeix-mbeix maiv benx**.
 - Mbuo maaih gamh nziex **wuonh dorngc** yaac gamh nziex **mienv muoqv**.

Naaiv deix jauv Tin-Hungh zungv hingh jiex nzengc, mv baac mbuo corc maiv muangx Tin-Hungh nyei waac corc muangx mienv nduov mbuo. Mbuo nyei loz-maengc nyei hnyouv se maaih camv haic mbuo yaac saav maiv nzengc aqv. Mbuo nyei loz-maengc waaic haic, mbuo cingx daaih tov yaac fungx bun Ziouv Yesu tengx mbuo dorh mingh ding jienv ziepc nzaangc jaax. Se gorngv mbuo nyei loz-maengc caux jienv Ziouv Yesu ding ziepc nzaangc jaax daic miaqv nor, mbuo yaac duqv siang-maengc yiem Ziouv Yesu daaih fih hhangv nyei. Mbuo nyei siang-maengc ziouc maaih Ziouv Yesu nyei hnyouv, maaih Ziouv Yesu nyei eix. Mbuo ziouc nzornz zuiz, nzornz waaic nyei jauv aqv. Se gorngv mbuo caux Giduc juangc maengc ziangh nor, mbuo ziouc maaih hnyouv oix zuotc jienv Ziouv Yesu nyei nyungc maiv zoux zuiz. Jiex leiz nyei jauv, se maiv zeiz wuom haih tengx mbuo nziaaux zuiz, yaac maiv zeiz wuom haih tengx mbuo hingh jiex zuiz. Se gorngv mbuo kung ei leiz zoux hhangv yaac maiv lamh longc, maiv haih tengx mbuo. Jiex leiz nyei jauv se weic zuqc Ziouv Yesu mbuox mbuo zoux. Hnangv naaiv mbuo benx Ziouv Yesu nyei mienh, mbuo cingx daaih horpc zuqc muangx Yesu nyei waac yaac ei jienv jiex wuom nyei leiz. Jiex liuz wuom nyei leiz, mbuo yaac oix zuqc sienx wuonv Ziouv Yesu bangc Ziouv Yesu tengx mbuo, mbuo cingx daaih maaih lamh longc. Jiex liuz leiz yaac maiv zeiz bun mbuo gauh maaih qaqv fai gauh maaih lingc. Mv baac qaqv caux lingc se bangc Tin-Hungh nziex mbuo hnangv. Mbuo jiex wuom nyei leiz se zoux yietc norm kuv zornz-zengx bun mienh hiuv duqv mbuo benx Yesu nyei mienh, muangx yaac ei jienv Ziouv Yesu nyei waac zoux.

Jangx jienv oc, mbuo haih maaih qaqv, haih duqv lingc hingh jiex zuiz, haih duqv lingc hingh jiex Saadaan se yiem Ziouv Yesu daaih hnangv. Mbuo jangx duqv nyei orqc, dongh Ziouv Yesu ganh jiex liuz wuom nyei leiz wuov zanc, ziouc zuqc Saadaan yiem deic-bung huaang seix Ziouv Yesu, nduov Yesu zoux dorngc. Mv baac Saadaan nduov maiv zuqc Ziouv Yesu. Weic zuqc Ziouv Yesu hiuv nzengc nyungc-nyungc, ziouc maiv bun Saadaan nduov Ninh. Mbuo hiuv duqv Saadaan nduov buo nzunc Ziouv Yesu. Nzunc-nzunc Ziouv Yesu yaac hingh jiex Saadaan miaqv. Ziouv Yesu ganh yaac longc Tin-Hungh nyei waac hingh jiex Saadaan. Weic naaiv, se gorngv mbuo oix duqv Tin-Hungh nyei qaqv tengx mbuo hingh jiex zuiz hingh jiex Saadaan nor, mbuo yaac oix zuqc hiuv, oix zuqc maaih Tin-Hungh nyei waac, maaih Tin-Hungh nyei Ging-Sou yiem mbuo nyei hnyouv. Ging-Sou nyei waac se Tin-Hungh nyei waac. Se gorngv mbuo maaih Tin-Hungh nyei waac yiem jienv mbuo nyei hnyouv nor, mbuo ziouc haih duqv Tin-Hungh nyei qaqv tengx mbuo hingh jiex zuiz, yaac bun Saadaan nduov maiv zuqc mbuo. Tin-Hungh nyei waac se maiv daan tengx mbuo hingh jiex zuiz hnangv, mv baac Tin-Hungh nyei waac yaac tengx mbuo nyei lingh wuonh haih hlo yiem Tin-Hungh, yaac tengx mbuo nyei sienx fim haih henv jienv mingh. Ging-Sou gorngv mbuo jiex wuom nyei leiz caux Yesu Giduc daic, aengx caux Giduc Yesu nangh daaih ziouc duqv caux Ziouv Yesu juangc maengc ziangh.

Mbuo ziouc maiv bun zuiz gunv mbuo nyei maengc aqv. Mbuo yaac maiv bun zuiz longc mbuo nyei sin zoux waaic sic aqv. Se gorngv mbuo duqv caux Ziouv Yesu juangc maengc ziangh nor, mbuo ziouc oix zuotc jienv Ziouv Yesu zoux kuv sic aqv. Ziouv Yesu cingx nzengc mbuo yaac oix zuotc jienv zoux cing-nzengc. Ziouv Yesu maiv gorngv-baeqc, mbuo yaac z uotc jienv maiv gorngv baeqc. Ziouv Yesu nzornz waaic sic, mbuo yaac zuotc jienv Ziouv Yesu nzornz waaic sic. Ziouv Yesu maiv pienx mienh, mbuo yaac zuotc jienv maiv pienx mienh. Ziouv Yesu hnamv mienh korh lienh mienh, mbuo yaac zuotc jienv hnamv mienh korh lienh mienh. Ziouv Yesu maiv douh ganh duqv longx, mbuo yaac zuotc jienv maiv douh ganh duqv longx. Ziouv Yesu maiv maaih ceng-hlo, mbuo yaac zuotc jienv maiv ceng-hlo.

Ziouv Yesu maiv ki mienh, mbuo yaac zuotc jienv maiv ki mienh. Ziouv Yesu tengx ndortv naanc mienh, mbuo yaac zuotc jienv tengx. Ziouv Yesu maiv nipc win, maiv jaav win, mbuo yaac zuotc jienv maiv nipc maiv jauv win. Ziouv Yesu laengz siev Ninh nyei maengc weic njoux zuiz mienh, mbuo yaac laengz siev mbuo nyei maengc weic tengx mbuo nyei gorx-youz hiuv duqv Yesu.

Hnangv naaiv mbuo jangx jienv oc, kungx maaih nduqc dauh zien Tin-Hungh hnangv. Kungx Tin-Hungh ganh hnangv haih njoux mbuo nyei maengc siex mbuo nyei lingh wuonh yaac haih dingc mbuo nyei zuiz. Kungx Tin-Hungh haih ceix en bun mbuo, yaac haih bun mbuo buangh heiv sic hnangv. Mbuo njaaux jiex wuom nyei leiz nyei jauv se weic oix bun dauh dauh jiex leiz nyei mienh haih hiuv dingc Tin-Hungh dongh haax dauh Ziouv Yesu dongh haax dauh Ziouv Singx Lingh dongh haax dauh. Mbuo hiuv liuz nor, mbuo ziouc tengx mbuo haih sienx wuonv Tin-Hungh, buoqc zangc Tin-Hungh, kaux Tin-Hungh nduqc dauh hnangv.

Naaiv zaang mbuo oix hoqc taux hnangv haax nor njiec buoz dorh mienh jiex wuom nyei leiz aqv.

Mbuo juangc fuh sux caux juangc dorh jiu baang nyei dauh dauh mienh muoz doic aac, dongh mbuo dorh jienv oix jiex wuom nyei leiz wuov deix mienh, njaaux ninh mbuo yaac dorh jienv ninh mbuo hoqc liuz

aqv nor mbuo ziouc haih mbenc tengx ninh mbuo jiex wuom nyei leiz aqv. Dongh mbuo hoqc jiex daaih wuov deix biao zaang se njaaux jiex wuom nyei leiz nyei mienh nyei jauv.

Naaiv se yiem mbuo njaaux nyei mienh, yiem mbuo dorh nyei mienh oix njaaux siepv fai donc yaac duqv nyei. Se gorngv mbuo oix njaaux siepv deix nor, mbuo longc yietc hnoi njaaux ziangx mingh yaac duqv nyei. Se gorngv mbuo oix longc yietc hlaax nyieqc fai gauh lauh deix njaaux yaac duqv nyei. Se gorngv longc yietc hlaax nyieqc njaaux nor, mbuo yietc norm leiz-baaix njaaux nzunc i nzunc yaac duqv. Dongh mbuo njaaux nyei ziangh hoc, gunv mbuox ninh mbuo maaih haaix nyungc oix jaax fai oix naaic yaac gunv naaic jienv mingh. Mbuo nyei gong se dorh ninh mbuo, tengx ninh mbuo bieqc hnyouv Singx Diex Singx Dorn caux Singx Lingh naaiv se gauh jienv jiex aqv. Dongh mbuo njaaux nyei ziangh hoc, mbuo oix jaa deix Ging-Sou weic oix bun hoqc jiex wuom nyei leiz wuov deix mienh haih bieqc hnyouv Tin-Hungh gauh longx nor, gunv jaa daaih tengx bun ninh mbuo aqv. Se gorngv maaih deix dorngx mbuo zorqv cuotv deix waac tengx mienh muoz gauh bieqc hnyouv longx nor gunv zorqv cuotv.

Da'faanh mbuo zorqv cuotv nyei caux jaa bieqc nyei maiv dorngc Ging-Sou ziouc longx aqv. Zuov mbuo njaaux ziangx ninh mbuo, mbuo ziouc dorh jienv ninh mbuo mingh jiex wuom nyei leiz aqv. Mbuo mbenc tengx ninh mbuo jiex wuom nyei leiz, mbuo se mbenc nzung, mbenc Ging-Sou caux mbenc dorh ninh mbuo jiex wuom nyei leiz. Se gorngv mbuo nyei jiu baang mienh camv nyei yaac maaih dorh nzung nyei mienh nyei nor, mbuo ziouc mbuox dorh nzung nyei mienh lorz ziangx jiex wuom nyei leiz nyei nzung. Aengx bun fin-saeng fai jiu baang mienh gox lorz ziangx Ging-Sou zunh doz taux jiex wuom nyei leiz nyei jauv. Fin-saeng fai jiu baang mienh gox yaac mbenc jienv dorh jiex wuom nyei leiz wuov deix bieqc wuom jiex leiz. Se gorngv mbuo nyei jiu baang maaih camv dauh fin-saeng nyei nor, bun nqoi gong zoux, maaih dauh zunh doz, maaih deix tengx jiex wuom nyei leiz yaac duqv. Zeiz nyei, naaiv deix se sueih mbuo jiu baang ca'laangh horpc zuqc hngangv haaix nor zoux gauh longx mbuo gunv hngangv wuov nor zoux aqv. Se gorngv maaih deix mbuo baux nzung nyei ziangh hoc mbui haic, nzauh heic mienh daaih nyaav mbuo hoic mbuo nor, mbuo maiv baux nzung yaac duqv nyei. Weic zuqc Tin-Hungh hiuv duqv mbuo oix zoux horpc Tin-Hungh nyei eix. Mbuo yaac oix baux nzung ceng Tin-Hungh bun Tin-Hungh njang-laangc, mv baac mbuo baux maiv duqv nyei ziangh hoc Tin-Hungh yaac hiuv duqv nyei.

Mbuo doqc Ging-Sou fai zunh doz faix nyei ziouc sekv sekv wuov ei jienv Ziouv Yesu paaiv bun mbuo zoux nyei gong tengx ninh mbuo jiex ziangx wuom nyei leiz ziouc longx aqv. Mv baac se gorngv mbuo baux nzung mbui yaac maiv benx haaix nyungc nor, mbuo ziouc lorz 2-3 diuh nzung yaac duqv, gauh camv deix faih gauh doqc deix yaac duqv nyei. Mbuo lorz ceng Tin-Hungh nyei nzung, laengz zingh Tin-Hungh nyei nzung, jiex wuom nyei leiz nyei nzung, caux njienh youh nyei nzung baux cengx Tin-Hungh. Weic zuqc jiex wuom nyei leiz nyei ziangh hoc, mbuo yaac a'hneiv njienh youh nyei baux nzung ceng mbuo nyei Tin-Hungh. Weic zuqc maaih mbuo nyei mienh muoz duqv dingc ninh mbuo nyei hnyouv daaih jiex wuom nyei leiz yietc liuz gan Ziouv Yesu.

Naaiv deix nzung yietc zungv longx zoux jiex wuom nyei leiz duqv nyei oc.

- Zoix Hlo nyei en, yiem nzung sou 82 wuov diuh.
- Ceng Njoux Ziouv, yiem 1 nzung sou da'yietv (1) wuov diuh.
- Ziouv Gengh Hlo Haic, yiem nzung sou da'faam (3) wuov diuh.
- Ceng Ziouv Yesu jaaix haic nyei mbuox, yiem nzung sou 16 wuov diuh.

Maiv daan naaiv deix hngangv, aengx maaih camv nyei. Da'faan laengz zingh Tin-Hungh nyei nzung, ceng Tin-Hungh nyei nzung diuh diuh yaac longc baux duqv nyei.

Aengx caux jiex wuom nyei leiz nyei nzung, dongh maaih 306 wuov buonv se dongh 167 wuov diuh. Mv baac dongh Siang Nzung Sou dongh maaih patv daan-baah nyei qiex wuov wuonv yiem 110a, 110a wuov diuh oc. Aengx caux 114 wuov diuh.

Se gorngv mbuo mienh muoz doic oix ei jienv naaiv zoux yaac duqv nyei oc.

Mbuo laengz zingh haic Tin-Hungh nyei en tengx jienv naaiv deix mienh muoz duqv dingc hnyouv jiex wuom nyei leiz. Weic muangx Ziouv Yesu paaiv nyei waac, yaac weic zoux zorng-zengx bun mienh camv hiuv duqv ninh mbuo benx Giduc mienh yaac yietc seix sienx wuonv Tin-Hungh hngangv.

Hngangv naaiv ih zanc mbuo jiex gorn baux nzung ceng yaac laengz zingh mbuo nyei Tin-Hungh oc. Mbuo lomh nzoih baux Zoix Hlo Nyei En, yiem nzung sou 82, wuov diuh. Aengx baux Ceng Ziouv Yesu jaaix haic nyei mbuox, yiem nzung sou 16, wuov diuh.

Daax gauh koi ziangh hoc.

Yie mbuo nyei lungu Zangc Diex aac, Laengz zingh haic Ziouv nyei en za'gengh hlo haic. Ziouv ganh hnamv yie mbuo njoux yie mbuo yiem Saadaan nyei buoz ndiev cuotv daaih, bun yie mbuo maiv zuqc dingc zuiz. Zangc Diex aac, ih zanc yie mbuo yaac yiem naaiv njienh youh a'hneiv weic naaiv deix mienh muoz dingc hnyouv jiex wuom nyei leiz. Yie mbuo tov Zangc Diex tengx jienv naaiv deix mienh muoz haih muangx nzengc Ziouv nyei waac yaac haih sienx wuonv Ziouv Tin-Hung. Tov Ziouv tengx ninh mbuo haih ziux Ziouv nyei njang bun mienh muoz haih mangc duqv buac jauv nzuonx daaih sienx Ziouv, yaac caux jienv jiex wuom nyei leiz oc. Yie mbuo hngangv dorh ziec daaux gaux dengv Ziouv Yesu nyei mbuox Aa^men.

Ih zanc mbuo aengx baaux nzung yiem 114, 114.

Fin-saeng aac, ih zanc bun naaiv norm ziangh hoc fin-saeng zunh doz aqv.

ZUNH DOZ

Mbuo ceng mbuo nyei Ziouv Tin-Hung weic zuqc Ninh zoux mbuo nyei Ziouv Tin-Hung, dongh zeix wuov dauh, Ninh ganh aengx laengz zoux mbuo nyei njoux Ziouv daic weic njoux mbuo yiem daic nyei buoz ndiev cuotv daaih yaac aengx laengz zoux mbuo nyei mbuo Ziouv yienz dorh mbuo nyei maengc mingh wuov ndaangc hingv. Loh hnoi mbuo zipv duqv baeqc fuqv mbuo gorngv maiv haih mbeix maiv buac domh naang bungx nqaiv jauv. Tov zuiz taux nqaiv wuov joux waac yie gorngv cuotv yiem mbuo jiu-bang doic nyei mbu'ndongx. Nqaiv se maiv maaih haaix nyungc jaa-zinh nyei gaah naaiv mienh cingx heuc nqaiv, fai beiv nqaiv hngangv, jaaix nyei ga'naaiv mienh se beiv orv fai jiem. Weic zuqc orv se kuv haic, jiem se jaaix haic. Mv baac beiv taux domh naang nyei nqaiv se jaaix haic ninh mbuo sienx zoux duqv ndie zorc baengc.

Ih hnoi Ziouv Tin-Hung dongh hlo jiez wuov dauh Ziouv ninh ganh laengz daaih tengx mbuo zoux njoux Ziouv, yaac aengx zoux jienv mbuo nyei Ziouv beu mbuo nyei amengc mingh wuov ndaangc hingv. Maaih baamh gen mienh haaix dauh laengz tengx mbuo heu mbuo nyei maengc hngangv Ninh nor? Maiv maaih yietc dauh liemh cingv nyei mienh yaac maiv haih zoux ndongc ninh duqv. Naaiv gengh longx jiex ndaangc mienh haih lorh duqv nyei miaqz.

Yie yaac oix laengz zingh meih mbuo yietc zungv jiu-bang doic; weic daaih caux jienv njienh-youh orn-lorqc mangc naaiv deix cien muoz doic mbuo ih hnoi a'dangh oix ei jienv Ziouv Yesu njaaux nyei waac jiex wuom nyei leiz.

Mbuo jiex wuom nyei leiz naaiv maaih haaix nyungc eix leiz?

Mbuo oix hiuv naaiv mbuo oix zuqc hiuv duqv maaih mba'ziex nyungc leiz jiex?

Eix jienv mbuo hiuv yiem mbuo nyei gingh sou nor se maaih i nyungc leiz jiez:

1. Yo^han nyei Jiex Wuom nyei leiz.
2. Yesu nyei jiez wuom nyei leiz.

Mbuo mangc-

1. Yo^han nyei wuov nyungc jiex leiz.

Naaiv mbuo buac mbuo nyei Ziouv Yesu ganh yaac jiez nyei. Mv baac Ziouv Yesu maiv jiez Ninh ganh liepc daaih wuov norm jiex wuom nyei leiz. Yie nzauh heix la'kuqv, liuz yie tov gorngv dangh weic haaix nyungc Yesu maiv jiez ninh ganh liepc wuov norm jiex wuom nyei leiz. Wuov norm se bun cing jiez wuov dauh mienh benx Yesu nyei mienh caux Yesu juangc maengc ziangh caux ninh juangc daic aengx oix caux ninh juangc naangh daaih. Liuz Ziouv Yesu se ninh ganh zoux Yesu, zoux Zangc Diex maiv zuqc jiex naaiv norm leiz aqv. Ninh kungx jiex Yo^han nyei leiz bun cing goiv hnyouv guangc zuiz maiv zoux aqv. Naaiv yaac maiv zeiz weic ninh ganh nyei zuiz mv baac benx nyungc zeiv tengx mbuo ndaam-dorng mbuo nyei zuiz hngangv.

Yesu jiex wuom nyei leiz

(beiv mangc Maako 1:9-11; Lugaa 3:21-22)

13 Wuov zanc Yesu yiem Gaa^li^li mingh Jor^ndaen Ndaaih, oix Yo^han tengx ninh jiex wuom nyei leiz. 14 Mv baac Yo^han oix Yesu goiv za'eix, ninh ziouc gornqv, "Horpc zuqc meih tengx yie jiex leiz, mv baac meih daaih lorz yie?" 15 Yesu dau Yo^han, "Meih gunv tengx yie aqv. Mbuo hngangv naaiv nor zoux, mbuo ziouc ei jienv Tin-Hungh oix zoux nyei zoux ziangx." Yo^han ziouc tengx aqv. 16 Yesu jiex leiz yiem wuom cuotv daaih wuov zanc, liemh zeih lungn nqoi. Yesu buac Tin-Hungh nyei Singx Lingh njiec daaih hngangv norqc nqo nor, yaac nzopc jienv ninh. 17 Maaih qiex yiem gu'nguaaic lungn gornqv, "Naaiv se yie nyei Dorn-hnamv. Yie za'gengh a'hneiv haic ninh."

Naaiv se Ziouv Yesu yiem Gaa^li^li mingh taux Njor Ndaen Ndaaih dongh Yo^han tengx mienh camv jiex leiz wuov norm dorngx, heuc Yo^han tengx Ninh jiex leiz. Hngangv ninh duqv tengx yietc zuangx Yiu-taai mienh daaih lorz jiex leiz wuov nor. Mv baac Yo^han hiuv duqv Yesu se zoux Giduc maiv zuqc jiex leiz weic zuqc ninh maiv maaih zuiz yaac maiv zoux zuiz nyei nouh oix zuqc zoux jienv zuiz mingh.

Yo^han cingx gornqv, "Meix daaih heuc yie tengx meih jiez leiz nor? Zien-zien nor yie horpc zuqc meih tengx yie jiex leiz maa!"

Yesu cingx kuinx heuc ninh gunv bungx hnyouv zoux duqv nyei, weic bun Tin-Hungh nyei gong duqv zoux ziangx mingh. Ninh yaac eix jienv mbuo baamh mienh jiex leiz se weic oix funx benx zuiz mienh div mbuo daic hngangv. Yaac jiex gorn zoux norm zingh ginx bun mbuo ganh hngangv.

Yo^han cingx tengx Ninh jiex leiz yiem Njor Ndaen Ndaaih.

Yo^han jiex naaiv nyungc leiz nyei eix leiz se tengx mienh mbenc zuov jienv zipv Ziouv Yesu. Weic zuqc naaiv norm ziangh hoc Ziouv Yesu maiv gaengh cuotv mbiangx yaangh. Mienh maiv hiuv duqv Yesu se zoux Tin-Hungh paaiv daaih wuov dauh Giduc aqv dongh Yiu-taai mienh zuov jienv wuov dauh.

Yo^han tengx mienh jiex wuov norm wuom nyei leiz se goiv hnyouv guangc zuiz:

Maako 1:4

4Yo^han ziouc daaih yiem deic-bung-huaang tengx mienh jiex wuom nyei leiz yaac zunh doz gornqv, "Oix zuqc goiv hnyouv guangc zuiz, jiex wuom nyei leiz, Tin-Hungh ziouc guangc meih mbuo nyei zuiz." Hngangv naaiv Yo^han tengx mienh jiex wuov nyungc leiz se tengx mienh mbenc ziangx zipv Ziouv Yesu. Mienh maiv haic benx Yesu mienh gornqv ganh maiv zipv Yesu zoux ninh mbuo nyei Ziouv. Yo^han tengx jiex wuov nyungc leiz se haaix dauh jiex wuov nyungc leiz se gornqv mengh wuov dauh mienh guangc zuiz maiv zoux aqv. Gamh nziex haaix Tin-Hungh, Tin-Hungh nyei guoqv taux fatv aqv. Yie guangc zuiz mingh oix mbenc ziangx zipv Yesu daaih zoux yie nyei siangh Ziouv gunv yie nyei maengc mingh wuov ndaangc hingv.

Aengx mangc Gong-Zoh 19:1-

1 Aa^bor^lo yiem Ko^lin^to wuov zanc, Baulo yangh wuov jiex wuov diuh jauv mingh taux E^fe^so Zingh. Yiem naaic ninh buac deix sienx Yesu nyei mienh. 2 Baulo naaic ninh mbuo, "Meih mbuo sienx Yesu wuov zanc meih mbuo duqv zipv Singx Lingh nyei fai?" Ninh mbuo dau, "Yie mbuo liemh maiv haiz jiex maaih dauh Singx Lingh." 3 Baulo aengx naaic, "Wuov nyungc meih mbuo jiex haaix nyungc leiz?" Ninh mbuo dau, "Yie mbuo jiex Yo^han nyei leiz." 4 Baulo gornqv, "Yo^han tengx mienh jiex wuov nyungc wuom nyei leiz se bun cing mienh goiv hnyouv guangc zuiz. Mv baac Yo^han zunh mbuox I^saa^laa^en Mienh ninh daaih ndaangc, aengx maaih dauh nqa^haav daaih. Mienh oix zuqc sienx wuov dauh, se dongh Yesu aqv."

5 Wuov deix sienx Yesu nyei mienh haiz Baulo hngangv naaiv nor gornqv liuz, ninh mbuo dengv Ziouv Yesu nyei mbuox jiex wuom nyei leiz. 6 Baulo maan jienv ninh mbuo, Singx Lingh ziouc njiec taux ninh mbuo. Ninh mbuo gornqv cuotv ganh nyungc waac yaac douc Tin-Hungh nyei waac.

Yiem naaiv mbuo duqv Bau-lo aengx tengx porv-mengh deix Yo^han nyei jiex wuom nyei leiz nyei eix leiz se hngangv haaix nor. Yo^han nyei jiex wuom nyei leiz se tengx bun cing ninh mbuo goiv hnyouv guangc zuiz maiv zoux aqv. Se gornqv oix benx Yesu nyei mienh se maiv zeiz kungx sienx Yesu hngangv wuov dauh mienh se oix zuqc dengv Diex, Dorn caux Singx Lingh nyei mbuo jiex wuom nyei leiz. Mbuo

buatc Bau-lo njaaux cing naaiv deix jiex Yo^han wuov nyungc wuom nyei leiz nyei mienh gorngv Yo^han wuov nyungc leiz se tengx mienh bun cing ninh mbuo goiv hnyouv guangc maiv zoux zuiz aqv nor hnangv. Se gorngv haaix dauh za'gengh oix benx Yesu nyei mienh nor aengx oix zuqc jiex Yesu njaaux wuov nyungc wuom nyei leiz nyei. Yesu wuov nyungc jiez wuom nyei leiz se oix dengv Diex, Dorn caux Singx Lingh nyei mbuo jiex wuom nyei leiz. Maaih hnoi nor maaih dauh jiu-bang doic naaic gaax, "Mbuo nyei jiu-bang nyei mbuox se heuc jiex leiz nyei jiu-bang se za'gengh sienx Yo^han fai?" Ninh aengx borqv jienv gorngv weic zuqc maaih dauh mienh nor gorngv, "Meih mbuo nyei jiu-bang nyei mbuox se heuc jiex leiz nyei jiu-bang, hnangv naaic meih mbuo se bun cing benx sienx zuqc tengx mienh jiex wuom nyei leiz wuov dauh Yo^han!" Mv baac yie mbuo nyei jiu-bang se heuc Giduc jiu-bang, naaiv se bun cing yie mbuo naaiv nyungc jiu-bang se benx Giduc nyei jiu-bang. Yie gorngv jiu-bang fai mbuo nyei leiz baaix dorngh nyei mbuox maiv zoux mbuo benx Yesu nyei mienh fai benx Yo^han nyei mienh, mv baac mbuo nyei hnyouv zoux un mbuo benx zien Giduc mienh fai maiv zien.

Yie gorngv, "Mbuo jiez wuov nyungc wuom nyei leiz se maiv zeiz dongh Yo^han tengx mienh jiex wuov nyungc wuom nyei leiz aqv, mv baac dongh Ziouv Yesu njaaux fai hatc yiem Matv^taai 28:19-20 wuov yaac dongh Bau-lo fin-saeng tengx porv mengh bun wuov deix sienx Yesu mienh yiem Ko^lin^to zingh maiv gaengh duqv jiex Yesu njaaux wuov nyungc wuom nyei leiz wuov. Hnangv naaic se mbuo nyei jiu-bang fai leiz baaix dorngh nyei mbuo heuc jiex leiz jiu-bang mv baac maiv zeiz sienx Yo^han nyei jiu-bang"

***** Yo^han tengx mienh jiex wuov nyungc wuom nyei leiz se bun cing mienh goiv hnyouv guangc maiv zoux zuiz mingh aqv.**

2. Ziouv Yesu wuov nyungc jiex leiz:

Naaiv diuh jiex wuom nyei leiz se mbuo nyei Ziouv Yesu ganh liepc daaih bun mbuo sienx nyei mienh horpc zuqc zoux eix jienv yietc doic jiex yietc doic.

Matv^taa 28:19-20

16 Wuov deix ziepc yietv dauh sai-gorx mingh Gaa^li^li Saengv, taux Yesu heuc ninh mbuo mingh wuov norm mbong. 17 Yietv buac Yesu ninh mbuo ziouc gueic njiec baaix ninh. Mv baac maaih deix corc hnyouv maiv dingc. 18 Yesu daaih fatv deix mbuox ninh mbuo, "Yiem lung h yiem ndau yietc zungv hatc maaz Tin-Hungh jiu bun yie mi'aqv. 19 Weic naaiv, meih mbuo oix zuqc mingh njaaux maanc fingx mienh zoux yie nyei sai-gorx. Oix zuqc dengv Die, Dorn caux Singx Lingh nyei mbuox tengx ninh mbuo jiex wuom nyei leiz, 20 yaac njaaux ninh mbuo ei nzengc yie mbuox meih mbuo zoux nyei nyungc-nyungc. Jangx jienv oc. Yie yietc liuz caux meih mbuo yiem taux baamh gen nyei nyutc zeiv jiex."

Naaiv se dongh mbuo heuc Ziouv Yesu ganh njaaux jiex wuom nyei leiz wuov aqv. Dongh ninh heuc sai-gorx mbuo oix zuqc tengx dongh haiz liuz Yesu nyei njoux en fienv yaac zipv sienx liuz Yesu wuov deix mienh se oix zuqc hnangv naaiv nor tengx ninh mbuo jiex wuom nyei leiz. Sai-gorx mbuo oix zuqc dengv Diex, Dorn caux Singx Lingh nyei mbuox jiex leiz. Yaac maiv daan kungx jiex liuz naaiv nyungc wuom nyei leiz baac miaqv, ninh mbuo aengx zuqc njaaux ninh mbuo hiuv nyungc dongh Yesu hatc heuc sai-gorx mbuo zoux nyei jauv. Liuz Ziouv Yesu cingx laengz caux yiem taux baamh gen nyei nyutc zeiv jiez.

Caux Giduc juangc biopv nyei eix leiz. Bau-lo porv mengh yiem Lomaa 6:1-7

1 Wuov nyungc, mbuo oix zuqc hnangv haaix nor gorngv? Mbuo corc oix zuqc baamz jienv zuiz mingh Tin-Hungh cingx daaih haih ceix en camv jienv faaux fai? 2 Zungv maiv zeiz! Ei zoux zuiz nyei jauv mbuo zungv daic mi'aqv. Wuov nyungc mbuo hnangv haaix nor haih zoux jienv zuiz mingh? 3 Meih mbuo hiuv duqv mbuo jiex wuom nyei leiz, mbuo duqv caux Yesu juangc maengc. Jiex leiz wuov zanc duqv caux ninh juangc daic. 4 Hnangv naaic, jiex wuom nyei leiz mbuo caux Giduc daic mingh biopv jienv weic bun mbuo duqv siang-ziangh maengc, hnangv Giduc daic mingh Tin-Hungh yaac longc njang-laangc nyei domh qaqv bun Giduc aengx nangh daaih ziangh jienv wuov nor. 5 Se gorngv mbuo duqv caux Giduc juangc maengc daic, Tin-Hungh bun mbuo nangh daaih hnangv ninh bun Giduc nangh daaih, mbuo yaac duqv caux Giduc juangc maengc ziangh.

6 Mbuo yaac hiuv duqv mbuo nyei loz-hnyouv zuqc caux Giduc ding wuov ziepc nzaangc jaax weic bun baamz zuiz nyei hnyouv zuqc mietc, cingx daaih maiv zuqc aengx zoux zuiz nyei nouh. 7 Weic zuqc haaix dauh daic mingh ziouc leih ndutv zuiz.

Ziouv gunv goux dorh mbuo yangh gan Tin-Hungh mingh. bun mbuo gan caux weic mbuo nyei zuiz liuz Ninh oix weic mbuo nyei zuiz daic nor ninh Jiangz jienv Yesu jiez leiz se maiv zeiz weic ninh ganh nyei zuiz liuz ziouc zuqc hnangv dau-dauh zuiz mienh nor sienx Yesu liuz zuqc jiez leiz. Ninh ganh se maiv

maaih zuiz, mv baac weic oix tengx daic div mbuo nyei zuiz liuz cingx daaih oix zuqc ei jienv hhangv zuiz mienh zoux nyei jauv nor zoux.

Nyungc-nyungc Tin-Hungh njaaux mbuo zoux nyei jauv se maaih eix leiz nyei. Wuov nyungc jiex leiz nyei eix leiz se haaix nyungc?

Hhangv naaiv eix Baulo njaaux mbuo taux jiez wuom nyei leiz nyei eix leiz se bun cing taux haaix nyungc:

1. Da'yietv weic mbuo duqv sienx Yesu zoux Tin-Hungh nyei Dorn, Tin-Hungh fungx Ninh daaih njoux mbuo yiem mbuo nyei zuiz cuotv daaih
2. Nyeic daaih mbuo sienx yaac zipv Yesu daaih zoux mbuo nyei Ziouv nyei mienh se caux Yesu juangc maengc ziangh jienv aqv.

I Ko^{lin} 5:17

Haaix dauh caux Giduc juangc maengc ziangh, wuov dauh benx siang-zeix daaih nyei mienh. Loz nyei nyungc-nyungc jiex nzengc, yietc zungv benx siang nyei daaih aqv. Yiem naaiv Baau-lo gorngv mbuo caux Yesu juangc maengc ziangh jienv nyei mienh haaix zanc Yesu daic nor mbuo yaac caux jienv daic aqv. Nyungc zeiv se hhangv guh-nguaaz yiem jienv ninh nyei maa nyei ga'sie nyei ziangh hoc se caux ninh nyei maa juangc mba'zongr tauv qiex, ninh ganh maiv haih tauv qiex. Hhangv naaic ninh se caux ninh nyei maa juangc maengc ziangh. Hhangv naaic gorngv maa haaix zanc daic wuov dauh guh-nguaaz yaac daic aqv. Mv baac ganh dauh guh-nguaaz maiv daic weic zuqc ninh mbuo maiv juangc ninh nyei maac mbuo juangc maengc ziangh.

3. Da'faam, se gorngv mbuo caux Yesu juangc daic nor ninh duqv naangh daaih mbuo yaac fih hhangv aengx duqv caux ninh naangh daaih ziangh jienv yietc liuz maiv daic aqv.

Mbuo ih hnoi maiv duqv caux Yesu yiem ziepc-nzaangc jaax daic; maiv gunv sai-gorx mbuo caux Ninh yiem wuov mv baac maiv duqv caux Ninh daic. Naaiv nyungc daic se mbuo daic caux Ninh yiem mbuo sienx Ninh nyei daic. Mbuo daic caux Ninh yiem mbuo Muangx waac ninh taux dauh taux mueiz maiv eix ganh nyei hnyouv hanc zoux haaix nyungc aqv.

Jiez leiz duqv aqv:

Se gorngv mbuo nyei hnyouv buangv nzengc hhangv naaiv nor sienx mbuo se jiez leiz duqv aqv.

Jiez Leiz maiv tengx duqv njoux!

Mbuo maiv zeiz weic mbuo jiez wuom nyei leiz tengx mbuo haih duqv njoux; mbuo duqv njoux se weic zuqc mbuo sienx Ziouv Yesu zoux Tin-Hungh nyei dorn, daaih daic yiem ziepc nzaangc jaax weic mbuo, biopv jienv buo hnoi hhangv Tin-Hungh bun ninh aengx duqv naangh daaih ziangh jienv nyei, weic mbuo hhangv naaiv sienx yaac weic mbuo zipv ninh bieqc mbuo nyei hnyouv daaih zoux mbuo nyei Ziouv cingx duqv njoux,

Yiem wuom hlen jiex wuom nyei leiz:

Gorngv ndoqv maiv mbenc nor yiem biauv maaih wuom zoh hlo gaux nor yaac yiem wuov duqv; maaih wuom se gauh buangv hnyouv mv baac se gorngv maiv maaih yaac maiv duqv faix hnyouv; gauh longc jienv jiez se mbuo nyei hnyouv oix zuqc za'gengh sienx. Mv baac ih hnoi mbuo se duqv yiem naaiv ndoqv jiex leiz.

Jiu-bang doic aac!

Ih zanc mbuo maaih naaiv deix muoz doic mbuo oix zoux naaiv deix zingh ginx bun mbuo hiuv duqv gorngv ninh mbuo yaac sienx Yesu zoux Tin-Hungh nyei Dorn, yaac zoux zuiz mienh nyei njoux Ziouv; ninh mbuo yaac zipv Ninh zoux ninh mbuo nyei gorv-zeic nyei njoux Ziouv yiem ninh mbuo ganh nyei maengc miaqv. Ih zanc yaac oix Muangx Yesu nyei waac dengv Singx Diex, Singx Dorn caux Singx Lingsh nyei mbuox jiex Yesu heuc jiex wuov nyungc wuom nyei leiz.

Ih zanc mbuo baux jiex wuom nyei leiz nyei nzung yiem 110a da'yietv caux da'nyeic ginc caux nzung-nzanc. (1-2) fapv nzung bieqv naaiv oc.

Ih zanc mbuo naaic deix waac Jiex Wuom Nyei Leiz Nyei mienh taux Nyiemc laengz Yesu nyei jauv oc.

Tengx Jiex Leiz Mienh:

M'Naix aac! Meih nyei domh mienh fai, jiu-bang mienh gox aapv meih jiex wuom nyei leiz fai?

Jiez Leiz Mienh: Maiv zeiz haaix dauh aapv yie, mv baac yie ganh buang hnyouv oix jiex.

- A. M'Naix aac! Hnangv naaiv meih sienx Yesu zoux Tin-Hungh nyei ndoqc Dorn nyei fai?
- B. Yie sienx nyei.
- A. Meih sienx Ninh zuqc yiem wuov ziepc nzaangc jaax ding daic weic meih nyei zuiz nyei fai?
- B. Yie sienx nyei.
- A. Meih sienx Yesu zuqc ding ziepc nzaangc jaax daic, yaac biopv jienv buo hnoi liuz Tin-Hungh longc Ninh nyei domh qaqv bun Yesu aengx nangh daaih ih zanc yiem wuov Tin-dorngh nyei fai?
- B. Yie sienx nyei.
- A. Ziouv Yesu ganh gorngv, "Ninh yiem wuov Tin-dorngh mbenc ziangx dorngx bun sienx Ninh nyei mienh, zuov taux ziangh hoc Ninh aengx daaih dorh yietc zungv ging hnyouv zuov jienv Ninh wuov deix mienh." M'Naix aac, "Meih sienx Ziouv Yesu yaac liemh meih dorh fai?"
- B. Yie sienx nyei, Ninh zungv maiv guangc yie.
- A. M'Naix aac! Meih laengz ziepc zuoqv hnyouv yaac benx dauh muangx waac nyei Yesu mienh nyei fai?
- B. Yie laengz nyei, kungx bun ninh ganh duqc dauh zoux Ziouv gunv yie hnangv.
- A. M'Naix aac! Hnangv naaiv ei jienv meih ganh nyei nzuuh laengz caux nyiemc nyei waac, yie ih zanc oix Ceng Tin-Hungh yaac dengv Singx Diex, Singx Dorn caux Singx Lingh nyei mbuox tengx meih jiex wuom nyei leiz.

Baaux nzung 110a 3-4 caux nzung-nzamec.

Ih zanc mbuo daaux gaux weic jiex wuom nyei leiz nyei mienh oc.

Yie mbuo nyei lungx zangc Diex aac, yie mbuo laengz zingh haic Tin-Hungh nyei en, tengx jienv naaiv deix mienh muoz duqv jiex liuz wuom nyei leiz aqv. Naaiv se Ziouv nyei en bun ninh mbuo yaac bun yie mbuo. Ziouv Yesu aac, ih zanc yie mbuo yiem naaiv tov Ziouv tengx jienv naaiv deix jiex wuom nyei leiz nyei mienh muoz doic, bun ninh mbuo maaiah qaqv sienx wuonv yaac muangz nzengc Ziouv nyei waac yaac ei jienv zoux. Tov Ziouv Singx Lingh zanx-zanc tengx jienv ninh mbuo haih zoux kuv sic weic bun Ziouv duqv njang-laang. Ziouc bun mv gaengh hiuv duqv Ziouv nyei mienh muoz weic ninh mbuo zoux nyei kuv sic haih nzuonx daaih sienx Ziouv. Yie mbuo hnangv naaiv dorh ziec daaux gaux dengv Ziouv Yesu nyei mbuox Aa^men.

Mienh muoz doic aac, se gorngv maaiah mienh camv nyei jiex wuom nyei leiz yaac gunv ei jienv naaiv zoux ziouc duqv aqv. Mbuo yaac jangx jienv maiv zuqc ei joux-joux naaiv deix waac gorngv. Da'faanh mbuo zoux nyei caux gorngv nyei maiv dorngc Ging-Sou nyei waac ziouc duqv aqv. Se gorngv maaiah mienh camv nyei jiex wuom nyei leiz nor, dongh mbuo baaux nzung 110a wuov diuh, dongh mienh bieqc wuom jiex leiz nyei ziangh hoc mbuo tiuv daaih baaux nangv nyei yaac duqv nyei. Jiex wuom nyei leiz nyei jauv se njiec nzengc mbuoqc naaiv aqv. Tov Tin-Hungh tengx jienv meih mbuo dauh dauh sienx Ninh nyei mienh duqv Tin-Hungh nyei qaqv, zoux jienv Ziouv Yesu paaiv bun meih mbuo dauh dauh zoux nyei gong mingh, yaac dorh mienh nzuonx daaih sienx Ziouv yaac tengx ninh mbuo jiex wuom nyei leiz.